

مروسة الولد

أحمد الليثي

الهيئة العامة لقصور الثقافة - فرع سوهاج - نادي الأدب المركزي

الهيئة العامة لقصور الثقافة

فرع ثقافة سوهاج

نادي أدب المحافظة

إصدارات النادي

الكتاب الرابع

© الطبعة الأولى ١٩٩٩ م

رئيس مجلس الإدارة

حسن سالم

المشرف العام

جميل محمود عبد الرحمن

رئيس التحرير

محمد عبد المطلب

مدير التحرير

محمود رمضان الطهطاوي

سكرتير التحرير

أيمن الحمال

مستشارو التحرير

محمد بخيت الربيعي د. بهاء مزيد

فاروق حسان فاطمة يوسف

بهاء الدين رمضان

الإهداء

إلى روح فنان المسرح العظيم أحمد عبد الله
فارس المسرح السوهاجي
ورفيق وره الفنان الراحل إبراهيم حافظ
فنان سوهاج الأول

أحمد الليثي

الاحتفالية الشعبية



إعداد وتأليف

أحمد الشيخ

تقديم

الاحتفالية الشعبية (نشل البير) ترجمة للواقع المعاش والعادات والطقوس والممارسات الشعبية اليومية التي يقوم بها الرعاة من قبائل البشارية والعبادة والرشايدة والأشراف بمنطقة مثلث حلايب . وتعبر عن أغاني العمل وطقوس الاجتماع الشعبي للرعاة وأرباب الإبل حول البير وعادات هذا الاجتماع من طقوس شعبية وممارسات اجتماعية جماعية، وفي هذه الاحتفالية الشعبية (نشل البير) يتم التركيز على قبيلتي البشارية والعبادة باعتبارهما القبيلتين السائدتين بشكل مكثف في أرض المثلث، حيث إنهما القبيلتان اللتان تصدتا لهجمات "البقاره" إبان الحركة المهدية في السودان بحثاً عن الآبار والإبل وهروباً من الجوع والقحط . حيث استطاعت القبيلتان وقف زحف البقاره عن منطقة المثلث وأجهزت على فلولهم في حرب (ميسح) وهي مكان بين شلاتين وأبو رماد وما يسمى أيضاً بحرب " الدراويش " وهم دعاة الحركة المهدية وقت أن كانت السودان تحت الحكم المصري .

وحيث يسعدنا أن نقدم أول تجربة إبداع جماعي على أرض المثلث، وحيث إن النص الذي بين أيدينا يتضمن بعض العبارات والمقولات بنص رطانتها الأصلية لأهل المنطقة سيتم توضيحها بمرادفات من عندنا حيث إن البشارية لهم رطانة والعبادة لارطانة لهم .

المؤلف

✿ المكان : مثلث حلايب .
✿ الزمان : ١٨٨٩م، إبان الحركة المهدية (حرب ميسم ،
حرب الدراويش)

اللوحة الأولى

(نشل البير)

(يبدأ العرض في شبه ساحة شعبية ، ومنطقة العرض سامر شعبي بشكل مفتوح ، ويعتمد العرض على شاشة "تليسينما" لعرض اللقطات الحية من المنطقة ذاتها والتي تخدم أحداث العرض وتخلق نوعاً من التهيئة الحسية والوجدانية للمتفرج الغريب على المنطقة حتى يكون هناك نوعاً من التفاهم المشترك بين المتفرج والعرض حيث خصوصية المكان واللغة السائدة (من المحتم أن تشملها الرطانة) وهي وسيلة التفاهم الشائعة بين أهالي قبيلة البشارية) .

كما يشتمل العرض على بعض قطع الديكور والخلفيات المجمدة التي تخدم مسار العرض فنياً ودرامياً إلى جانب الاكسسوارات الشائعة في المنطقة من أدوات العمل والمعيشة وكذلك الحرب وأداء الرقصات والطقوس الشعبية ، والملابس ملابس المنطقة المناسبة لخصوصية النص

الذي يطرح واقعهم وحكاياتهم الشعبية وعاداتهم وتقاليدهم وطقوسهم
وألعابهم الشعبية أو ما يسمى "بالونسه" مما يقابل سهرات الشعبيين في
الوادي وينتقل العرض من لوحة إلى لوحة بتيمة موسيقية مستوحاة من
الموسيقى الشعبية بالمنطقة .

الرعاة (يدخلون من اتجاهات مختلفة يطلقون نداءاتهم وهم ماضون في
تسريح الإبل والأغنام إلى حيث المرعى والعقول الذي ينبت

على المطر في الصحراء)

راعي 1 : الله هيه الله هيه الله هيه .

راعي 2 : أوو أوو أوو .

راعي 3 : هي هي هي (يصدر بقمه أصواتاً تشبه النداءات) .

راعي 4 : كوا ساكوا إسقى البهائم .

راعي 5 : هو هوه .. هي هي . إر إر .

(يبدأ الرعاة في سقاية الإبل اثنين على البير لاستخراج المياه

وواحد يقوم بتفريغها في حوض صحراوي لشرب الإبل

واثنين يستحثون الإبل ويرغبونهم في الشرب) .

الرعاة : (يغنون أغنية العمل ونشل البير بالرطانة)

هيبلادي .. يَم أسكاريه

تلايجاي ... توبور هداي

هاروى تنون ... كيكن شتيت

اكسيرنا نون ... كيكن شتيت

ولاي هومين ... ألايكواسا

صبي 1: ها هيه ها هيه (يضرب الإبل بالعصا وهي تشرب)

راعي 5: يا ولد بلاش تدق الإبل .

صبي 1: هسه ما عايزه تشرب .

راعي 4: يا زول اسمع الكلام ..

صبي 1: داجيم بابا هسه مهما ندق ما يبحس (يستمر في الضرب)

راعي 5: دا ما بهيم . انت اللي بهيم . انت لو دقيته هسه . ما

بيكلمك الآن . لكن بعدين بيحملك ضعانة . وساعة انت

ما بتكون غافل . يدقك دق خسارة لو بعد سنه .

راعي 1: ياللا يا . عقل الجمال ، برك يا . برك .

راعي 4: " إخ إخ إيه إيه "

راعي 5: " إخ إخ إيه إيه "

راعي 3: هارين هاربه تشا هارن تشا .

راعي 4: أوو إخ إخ تشا .

راعي 5: إيه إيه تشا إخ إخ إخ

راعي 1: ياللا يا ولاد إحلبوا البهائم

واعبي ٢ : سوى الجينه يازول .. كشكش الثن يا ولد

واعبي : ياللانفرين يقوموا يجلبوا اللبن . ياللانفرين سريع كده .

واعبي ٤ : هيد شُما . هيد شُما . أرر أرر . هيدشما . هيامدَّيه . هيد

مدَّيه

واعبي ٥ : إوعى تكب اللبن ، إعمل حسابك .

واعبي ١ : (يلاحظ هذه العمليات التي تتم جميعاً من حلب الإبل وعمل

الجِنَّه (القهوة) فيسرح بعيداً مناجياً الخلا مع نفسه

ويقول "هبايات" تشبه الدوبيت وفن المربع الشعري) .

واعبي ١ : بعدما تخلصوا حلب اللبن سوولنا عصيده عايزين نططو . زود

ميه ودقيق عشان الشباب

واعبي ٢ : الله بالخير

واعبي ١ : الله بالخير

واعبي ٣ : سمعنا هبايات يا شيخ

واعبي ١ : الله يجيب الكلام .. زي ما بنريده يجيب المطر . كمان يجيب

لينا الكلام

واعبي ٤ : حرك حرك العصيده .. هات اللبن

واعبي ٣ : زود النار .. حرك زين .. حرك صُبَّ اللبن

واعبي ٥ : حد بيريد يشرب

راعي ٣ : هات والله .. (يشرب ويناول غيره) خد يا أدروب خليلك

تتحن

راعي ٥ : (يخطف الإناء) هات يا شيخ العصيدة أهم (الجميع

يضحكون)

راعي ١ : (يقطع الضحك) زمان الفراق عند الحجير مارقين

اليوم السعيد أمسى بروقن بارقن

واتحققن الليالي من تريده مفارقن

إبكن يا عيون يا كباد اتحرقن

يا مرض العقول بعد الوجود اتفرقن

الرعا : أبشر أبشر (يحبونه على جميل المعنى)

(تدخل التيمة الموسيقية مع تجمعهم حول إفطار العصيدة وتخفت

الإضاءة تدريجياً حيث يستعدون للانصراف والرحيل من

حول البير بعد جمع حوائجهم وعدتهم)

راعي ١ : يالانسقي الإبل كمان عشان نمشي

راعي ٢ : يالا .. أوو .. يالا أووو .. أش أش

راعي ٣ : ألايكواسا

راعي ٤ : هيلادي

راعي ١ : هيلادو

المعزّه الغر
لبنهن مر
يوجع في القُرْ
سمنهن زين
دوا الراكبين

هبلاديه راعي ٢ :

هو محمدية

حلبوكي لي .. في روض حي
أم العواى .. لبنك دواى
العواغر .. ليش لبنك مُرْ
يوجع في القُرْ يوجع ما يضر
راعي ١ ، راعي ٢ : (معاً في أداء سريع إيداناً بالرحيل)

ابيض جراى أسود شديد

أحمر لبان هو بلادي

ليه هجرتي .. ما يدركي

ليه هجرتي .. ما فجرتي

حوضك يركي .. يشبه البركة
هوبلادي .. هيبلادي
(تمتزج مع الغناء الموسيقى التصويرية مع تليسما في الخلفية لحظة غروب
الشمس)



(مجلس العرب)

(يدخل مجموعة من العربان واحد تلو الآخر ويجلسون في ساحة ،
والخلفية عشة من عشب البرش والخلفية لوحة تلسننما
تصور امتداد الصحراء وأشجارها البرية .. يتوافدون مع
همهمات معينة مع بعضهم البعض في انتظار خروج الشيخ
(

شيخ القبيلة: (يخرج من العشة) السلام عليكم .

الجميع : وعليكم السلام ورحمة الله .

الشيخ : كيف حال العربان .

الجميع : زين والله ، الحمد لله ، الله بالخير .

الشيخ : فتدي بابه

عبادي ١ : أخبار البقاره ما وصلتك يا شيخ .

الشيخ : وصلني أخبار كل شيء

بشاری ۱ : احنا ما في البقاره هسه .. دول دراویش ما لنا شأن بیهم

شأنهم ویا الانجلیز .

عبادي : شأنهم في حدودهم .. لكن لما بيجوا على حدودنا .. من لازم يبقالنا شأن . وشأن مهم يا أخي .

الشيخ : خلتنا الآن في مشاكلنا وبعدين نشوف مشاكل الناس .

عبادي : دي أكثر من مشاكلنا .. لازم نكون جاهزين . لو نزلوا علينا نسوي إيه .

بشاري ٢ : ما مشكلتنا الدراويش ، إحنا مشكلتنا البير ، البير دا حق قبيلتنا بتاع حدودنا .

عبادي ٢ : إحنا ماقلنا شيء .. كمان بهايما حقها تشرب ما حد يمنعها

بشاري ٣ : إحنا ما منعنا حد .

عبادي ٣ : أمس جينا البير وما خليتولنا وقت كافي لبهايما ورجعت بدون مويه كفاية .

الشيخ : ما شربت كل بهايكم .

عبادي ٢ : ما شربت والله يا شيخ .

الشيخ : دا كلام ما جايز إحنا طول عمرنا ما اختلفنا في شيء مثل ده .

بشاري ٢ : نقسم الوقت بيناتنا .

الشيخ : ما نقسم وقت . البهائم الواردة ع البير متين ما تورده تشرب سوا ، من كل القبائل . إحنا ما في فرق بيننا . ولا

عايز أسمع كلام عن البير .. البير للجميع .. فيه حد عنده كلام ؟ .

بشاري ١ : أنا مستني المواعيد بتاعي وذلوك الشيخ جه تمام . والشهود بتاعي موجودين . تمام ، وأنا جيتك دلوك على حسب المواعيد . وشوف كلامه هوه . وبعد كده أنا أتكلم .

الشيخ : هو المشكله إيه ذاتها . المشكله إيه .

بشاري ٢ : احنا عارفين المشكله . بس انت إيه . وضحلنا . عرف الشيخ

عبادي ١ : الناقه . المشكله بتاعتهم الجماعه ديل .

بشاري ١ : الناقه بتاعتي ، يعني إيه : من صغير قبل ما أضع عليها العلامة مشت مع أمها .

الشيخ : طيب .

بشاري ١ : أخذت سنه وأسأل أنا قالولي راحت العلاقي وجات من العلاقي وتاني وردت إلى البير .

الشيخ : إيوه .

بشاري ١ : من أدنديب إلى أبو رماد تاني جات إلى الشلاتين مع جمال كثيره .

الشيخ : طيب .

بشاري ١ : تمام . مسكت هنا ..

الشيخ : أيوه .

بشاري ١ : بعد شهر قالولي دي بتاعت عثمان . تمام .

بشاري ٢ : بقت بكره كبيره .

بشاري ١ : بقت بكره كبيره .

الشيخ : أيوه .

بشاري ١ : تمام . بعد سنتين الكلام ده . من ست ايام سمعت . إن

عثمان مودر ناقه . وقال الناقه دي بتاعي . وأنا عندي

أباله شاهدين بتاعي . عارفين الناقه دي تمام .

الشيخ : كويس .

بشاري ١ : وفيه ناس بتسقي على البير عارفينها . تمام . وعثمان

عايزين نشوف مشكلته إيه . عملنا فيها إيه في مجلس قبل

كده . وليها شهود وربطنها ال إيه .

بشاري ٢ : الشيخ هاشم .

بشاري ١ : الشيخ هاشم .

بشاري ١ : دلوك إحنا حاين نشوف الشيخ هاشم .

الشيخ : إيه قولك يا عثمان .

عثمان : صلوا على النبي .

الجميع : عليه الصلاة والسلام .

- عثمان : الناقه دي ودرانه مني وهي بعشرها .. ضايعة وهي عشر ،
الناقه دي بعد سنه جاتي براها .. جاتي بدون الجنا بتاعه .
- الشيخ : أيوه .
- عثمان : جيت لما سألت ع الناقه دي قالوا البكره شفتها في بهائم
تانيه . ولقت ع البهائم التانيه . ما فوق منها أي علامه .
- الشيخ : طيب .
- عثمان : البكره دي ، البهائم بتاعتنا . علي سيد طه يعرفها .
- الشيخ : طيب .
- عثمان : يعرف الأتر وعرف الشكل . اليوم ده فضل مئات سويننا
فيهم .
- الشيخ : طيب داير تتلبط فيها ولا هو ؟
- عثمان : ما شغال لبطي .. إللي راح ده . موجود دلوقتي حالياً .
- الشيخ : إيه رأيك يا علي في الموضوع ده .
- عثمان : البهائم ديه يعرفها علي سيد
- الشيخ : آه يا علي . إيه قولك .
- علي : أيوه . الناقه دي . شكلها من نياق عثمان . عرفوها الناقه
الفوق البير كلهم .
- الشيخ : العلامه ما عليها ؟
- علي : ما عليها .

الشيخ : ولا أي حاجه .
علي : ولا أي حاجه .
الشيخ : طيب وانت .
بشاري ١ : أنا بتاعتي ولدت عندي . وراحت . بعد سنه جات . ومن
الأول هي ماشيه مع أمها ولّمن كبرت جات ثاني على البير
كل ما بسأل بيقولولي بتاعتك .
الشيخ هاشم: معاك شهود انت بالموضوع ده .
بشاري ١ : على البير .
الشيخ : جايب معاك حد شاهد .
بشاري ١ : فوق البير .
الشيخ : أمال جاي ليه من غير شاهد .
بشاري ١ : أنا جاي . تدولي منات . تحلوي . أنا ليه ناس . وليه
شهود .
عثمان : (محتداً) انت ليك ناس وإحنا مليناش ناس .. أنا معاد
واتنين مالقيت حل ليه . هوه بيقول عندي مواعيد ، عندي
ناس ، مش عارف إيه .
الشيخ : إنت ليه ما جيت الأبالة بتاعك الشاهدين .

بشاري ١ : الأباله بتاعي في "لتماراب" فوق . القش بتاعنا هنا مافيش
قش . وعشان كده أنا جيت لحالي . والأباله فوق .
نسيب البهايم هناك . عشان بهيمه وحده لا .
الشيخ هاشم : طيب أنا أقول لك حاجه واحده صلي على النبي .
الجميع : عليه الصلاة والسلام .
الشيخ : لوقتي لوجينا الناقه دي وسط بهائم ناس عثمان . وطلقناها .
تعرف أنهى ناقه بتاعتك انت ؟
بشاري ١ : من أترها بعرف ، مش يعني شكلها . من أترها بعرفها .
الشيخ : تطلع لي من وسط البهايم .
بشاري ١ : بالأتر بتاعها بعرفها .
عبادي ١ : يا شيخ البكره دي ممكن تعرفها بالوبره بتاعتها . بالشعر .
بالشعر إذا كان تبع الناس ديل، ولا ديل .
الشيخ : إيوه بعرف بس هيه ما ورهالنا .
عبادي ١ : جيبوا الناقه كده .
عثمان : الناقه فوق البير القريب داك .
عبادي ٢ : قوم يا شيخ شوف الناقه فوق البير واقفه . انت قوم شوفها
من شعرتها البهيمه .
بشاري ٢ : قوم فصلها تمام وشوفها كده .

الشيخ : نشوف (يقوم ومعه مساعده ، ويخرجان قريباً) ياللا يا

بيننا نشوف .

بشاري ٢ : بصلها تمام وشوف . اتقدم عليها يا شيخ .. وقفها كده

وشوف .

تابع الشيخ : (من الخارج) اش اش أوو تشا تشا

عثمان : بعد . كفايه المرة الثالثة دي . برضه ما جاب ناسه . يبقى

كده إحنا إيه عملنا اللي علينا وصبرنا التلاته مرات ديل

.. ميعاد بعد كده ما عندنا . احكم بينا . إحنا ما فاضيين .

عبادي ١ : دلوقتي الشيخ يفصل ويشوف .

عثمان : المره الثالثه دي ناجي في ميعادنا

عبادي ١ : إن شا الله بتقضي . إن شا الله بتقضي .

الشيخ : صلوا على النبي .

الجميع : اللهم صلي عليه .

الشيخ : البهايم دي لما تشيع . بتجدد الشعر . ولما تشيع بتغير

اللون . هه .

الجميع : عارفين ، بتغير اللون ، تمام .

الشيخ : بتغير الشعر لكن دلوقتي تعبانه شايفها . ما عارف أنا . ما

نقدر نحكم وناخد ذنب ، نعمل مواعيد تاني .

عثمان : مواعيد تاني ما نقدر .

الشيخ : بالسهوله كده يا عثمان .
عثمان : مواعيد تاني ما نقدر .
الشيخ : انت لازم تصبر . الصبر فيه كل حاجه كويس .
عثمان : إلكره قاعده فوق البير مش عايز تمشي كده ولا كده .
الشيخ : إلكره قاعد ما حتتحرك .
بشاري ١ : وأنا كمان ما أسلمها ليه هوه .
عبادي ٢ : سلمها للشيخ .
الشيخ : أنا إللي أستلمها .
بشاري ١ : في بهائمك انت عثمان مشواري طويل .
الشيخ : ما عندي مشكله ، ذي ما بتقول بتاعتك قول ، يمكن
ياجيننا واحد تالت مش معروف . الناقه من غير علامه
كل الناس تتسيدها .. ما معروفه كل واحد يتسيدها
عثمان : خلاص حدد مواعيد يا شيخ .
الشيخ : خلاص بعد أسبوعين تجيب الأباله الشهود بتاعك .
وتاجينا انت وعثمان ونشوف الأتر وجايز كمان يظهر لنا
زول تالت ونشوف الأتر . والأتر يقول بتاعت مين فيكم .
عثمان : لا أسبوعين كثير .
بشاري ١ : أنا كمان مشواري بعيد في جبل التماراب .

- عثمان : وماله يوم رايح ويوم جاي ، يعني يومين والثالث تكون هنا يا أخي .
- الشيخ : انت ما تحدد يا عثمان خلاص بدل أسبوعين يبقى أسبوع وتتقضي إن شاء الله . نشوف موضوع ثاني .. كفايه كده .
- عبادي ٢ : أنا معاي الولد ده أنا داير أخطبله .
- الشيخ : ماتروح تشوف صاحب الشأن وتخطبله منه ؟
- عبادي ٢ : ما هنا يا شيخ أبو العروسه أهو قاعد .
- الشيخ : فينه . قاعد هنا ؟ .
- عبادي ٢ : أنا داير أخطب بنت عثمان .
- الشيخ : جري إيه يا عثمان . عايز الناقة . وكمان عايز تعرس لبنتك عثمان : أنا ما قلت عايز أعرس . أنا ما وافقت .
- الشيخ : وليه ما وافقت ؟ .
- عثمان : معاي مشوره . ابن عمها جايز يقول عليها .
- الشيخ : كام سنه بنتك دي
- عثمان : خمسناشر سنه .
- الشيخ : يا راجل لو كان ابن عمها داير يخطبها كان قال . وهي عندها حداشر سنه . لا قول كلام ثاني
- عثمان : والله يا شيخ دا نصيب . برضه أرجع أشاور .
- الشيخ : يمكن ما عاجب العريس .

عثمان : العريس زين الشباب والله
الشيخ : يمكن أبوه قروشه قليله . فقير يعني
عثمان : والله ما قصدت شي . أنا باشاور وأرد عليكم .
الشيخ : انت ماتشاور إلا نفسك . وانت ما عندك اعتراض على
العريس . وكمان ما عندك مانع في أبوه .
عثمان : والله الناس ديل ناس أحسن مني .
الشيخ : يبقى خلاص ولا كلام ثاني .. قول للراجل كلمه .
عثمان : (لا يرد)
الشيخ : خلاص مبروك يا ولد مبروك (الجميع يباركون عثمان
والعريس) .



اللوحة الثالثة

“ السماية ”

[السبوع]

(في الخلفية على شاشة تليسما شروق الشمس على أصوات قننين ثم
تتغير الشاشة على العشب البدوية مع ظهور أصوات قننين
الأطفال في سماية المولود أي سبوعه — فتقول المرأة
البشارية كلمة هودنا أي نام نام هودنا يا هودنا . لولا
لولا : أي نام نام)

صوت سيده ١ : هودنا يا هودنا

بت العسكر جنبنا

تمشي وتسكر جنبنا

بت المدير جنبنا

تمشي وتدير جنبنا

يا عبد الله
شيل الحلة
الحلة ثقيله
وقعت مني
كسرت سني
جابوا الضابط
أحسن مني

صوت سيدة ٢ :

لولا يا لولا
أبوكا سافر مكة
يجيب لك صندوق كحكه
الصندوق عند الدكان
والدكان عايز مفتاح
(يدخل على الأغنية مجموعة فتيات صغيرات حوالي
أربعة أو خمسة)

والمفتاح عند الحداد
والحداد داير فلوس
والفلوس عند الوليد
والوليد داير لبن

واللبن تحت البقرة
والبقر داير حشيش
والحشيش داير المطر
والمطر في إيد الله
لا إله إلا الله
محمدًا رسول الله
(تتحلق الفتيات في وضع جلوس ويلعبن "الفات فات" مثل "التعلب
فات فات")

البنات : الفات فات
في ديله سبع لفات
والجبه وقعت في البير
صاحبها واحد خنزير
والهون ضرب التليفون
والعسكر واقف طابور
عم علي بيع الزيت
أم قرقر فانت عليه (أم قرقر : حشرة)
(في هذه الأثناء يدخل الأطفال في لعبه شعبية اسمها يتكاسو وهي
حرب حراب — ثم يتزلون ويغنون "الغاليه واعزك" من

أغاني التراث في المنطقة ويقلدون الكبار في حركة السيف

والدرق)

الأولاد :

الغالية ووو : في الحوش شرد وزك يا

الغالية ووو : في الحوش شرد وزك يا

الغالية واعزك ... في الحوش شرد وزك

يا غلة الساقى

يا مسك عياقى

يا الحلب الشايقى

ما يقوما يا رايق

الغالية ووو الغالية وأعز يا

الغالية واعزك

في الكون ظهر حسك

يا ناقشة الحنه

(تدخل السيدات في هذه الاثناء يقمن بتزيين

العروس ووضع الحنه وتمشيطها وتصفيرها تصفيراً يشبه

التصفير الفرعوني)

يا ناقشة الحنه أنا ليه بامنى

انشالله يتهنى

الغالية ووو الغالية واعزك يا

الماشيه تتمخطر

ذي مشيه العسكر

يا منوره السهره

وعقولنا منيهه

يا جيتي لي زهره

ودي رقصة المهره

الغاليه ورو . الغاليه واعزك يا

(تظهر أصوات الرجال من الخارج .. وتتم الزغاريد ونسمع

جمل من الخارج .. حيث تختفي السيدات والعروس في

الداخل . داخل العشش)

صوت : سميتوا الوليد إيه

صوت : سميناه عوض .

صوت : زين والله عوض الله .. الله جاب الخير .

صوت : اسم زين الله بالخير .

صوت : زغاريد

(تستمر الفتيات في أداء لعبة شعبية .. ومحتواها : إحدى البنات

تجر وراءها ثلاث بنات وتأتي إحدى البنات تتهمها بأنها

سرق العنيز ملكها [أي : السخلان] وتحاول الأخرى

أن تدافع عن الغنم وتكذب المدعية ، وفي هذه الأثناء تدخل
شخصية غريبة على المسرح يظن أنها هاربة من خطر ما) .

بنت ١ : الحيص حيص غنمي .

بنت ٢ : كذاب يا عربي

بنت ١ : والله ديل غنمي

بنت ٢ : كذاب يا عربي

بنت ١ : (تنادي على الغنم) بيوض

صوت : باء باء

بنت ١ : صفور

صوت : ماء ماء

بنت ١ : الحيص حيص غنمي

بنت ٢ : كذاب يا عربي (يخلو المسرح من الأطفال حيث ينتقل اللعب

بهم إلى الخارج ، وهنا يختفي أيضاً وسطهم الشخصية

الغريبة عن المكان .)

(ثم يدخل مجموعة شباب يقومون بذبح الكرامة الخاصة للسماية

ويقومون بأداء لعبات تدل على الفروسية والقنص على

الفريسة المتوحشة ويقوم بالاشتراك معهم في التدريب

كاتول مختفياً وسطهم . يتجمع الأطفال ، الأولاد حيث

يشاهدون هذا الطقس وهو بمثابة تدريب عملي على

الفروسية والطعن، والقتال ومقاومة العدو . هنا يدخل
البقارة ويقبضون على الأطفال أولاد وبنات وتظهر
السيدات صارخات ، ويقوم البقارة بقتل الجميع وبعض
شباب الفروسية . ويفر كاتول هارباً وهو قاص الأثر ،
ومدرب الفروسية فهو يجيد العدو السريع)

صوت ١ : (أحد البقارة وهو قائد المجموعة) اقتل كل العيال حتى
الجنا في بطن أمه ما تبقىوا حداً منهم، والباقي يلحق ككتول
(بإشارة منه)

صوت ٢ : كاتول هرب ذي الشيطان .

صوت ١ : لازم تقبضوا عليه وتجبوه حي مش ميت فاهمين سامعين اقتل
، إحرق ، متخليش عبادي ولا بشاري .



الطهفة الرابعة

العرس

(العرب جالسون وشيخ القبيلة والجبته [القهوة] توزع على الجالسين ..
وعثمان أبو العروس الذي كسب الناقة)

الشيخ هاشم : مبارك العرس يا عثمان .

علي طه : قوله مبارك الناقة ، الناقة رجعت ليه .

هاشم : حقه والله ، والبركة في قص الأتر بتاعك ، والله طلع

كذاب الزول بتاع جبل التماراب .

عثمان : اتأخرتوا كثير يا شيخ هاشم .

هاشم : والله يا أخي ، إحنا في طريقنا باركنا سماية مولود في عزبة

عبد الرسول .

عثمان : دا مشوار بعيد يا شيخ هاشم تلاقي الإبل تعبت . حط

قش للإبل يا زول .

هاشم : شكراً يا عثمان ملوش لازمه يا أخي . الإبل واكله .

عثمان : أنا مستيكم من الصباح . وأدينا العصر .

علي طه : إحنا ما قعدنا . إحنا باركنا وهنيئا واحنا واقفين . وجبنا
معانا أبو الوليد .
عثمان : مبروك يا حسن .
حسن : الله يبارك لك يا عثمان . مبروك عرس بتك
عثمان : سميت الوليد إيه .
حسن : سمناه عوض .
عثمان : عوض الله بالخير .
حسن : الحمد لله .
عثمان : نجيب الكرامة الآن يا شيخ هاشم
الشيخ هاشم: تراك دايح غنم ولا إبل يا عثمان .
عثمان : دايحين جمل بعرور صغير ..
هاشم : خير خير
علي طه : أبشر يا أدروب . أبشر جالك الفرج (الجميع يضحكون
(
هاشم : استنى يا عثمان . الأكل وقته بدري .
أدروب : والله يكون أحسن . عشان نكون هضمنا الكرامة اللي
أكلناها في السماية
(الجميع يضحكون)

هاشم : مادام كده يبقى عشان نضم زين تسمعنا "هبايات" .

حاجات كده تبسط الجمع العزيز ده .

أدروب : فوق راسي فوق راسي .. (مسك طنبور ويبدأ العزف
منشداً الهبايات)

أدروب : أنا قلت هبايات ومحمد نعيم يغني .

الشيخ هاشم: محمد نعيم فنان أصيل . أكيد يشارك عرس القبيلة

محمد نعيم : فوق راسي . نغني عن الغزال .

أدروب : والغزلان في الوادي كثير

الشيخ هاشم: محمد نعيم غزالاته . غير غزالاتك يا أدروب

علي طه : محمد نعيم . وين ما يقدح عليه محنه . يجيب الغزال

والتايهه . ولو بسرعة البرق

(محمد نعيم ممسكاً بالطنبورة)

عثمان : أبشر أبشر يا نعيم .

الشيخ هاشم: بمناسبة الغزال دي . فيه مثل يقولوه أجدادنا " وطني ولا

مالي بطني "

أدروب : وطني ولا مالي بطني ؟ هو فيه أحسن من تعبئة البطن .

هاشم : مخك تخين ذي جسمك الوطن ما يعلاه شيء يا ولد ،

الغزالة شالوا القش من قدامها وحطوه بعيد جابوها لحل

القش عشان تاكل . وهيه أبداً أبت إنما تقيف (أي تقف)

لحلها . راجل شالها وداها حدا القش . في الصباح أصبحت
في الحل حقها . قال ليها خليتي القش وريحتي في الحل اللي
ما فيه قش ليه ؟ قالتله وطني ولا مالي بطني .

عثمان : الحل المفتاح أنت عليه . ما بتريد غيره بلد تاني .

محمد نعيم : (يدندن على الطنبور)

موال : الغزاله مشت ليه ومشت غادي

خدت قلبي بحز جبال عليه

ساكن بعيد عن الناس والاقوام

ساكن برايا مع النغمات الرنانه

محمد نعيم : (غناء بلحن) وين وين أشوفك وين أشوفك، أنا يا غزال

المرددون : (يقفون ويصفقون بالكف ويرددون الغناء) وين وين

أشوفك وين أشوفك أنا يا غزال

محمد نعيم : آه يا راكب الجمل فوق السرج سايق العقل وين يا غزال .

المرددون : وين وين أشوفك وين أشوفك أنه يا غزال

محمد نعيم : وين الماشيه البحر . لابسه الخفيف . ويا الذهب . وين

الغزال .

المرددون : وين وين أشوفك وين أشوفك أنا يا غزال

محمد نعيم : آه ساكنه المطر فوق الخضار وسط الجبل . فين يا غزال

المرددون : وين وين أشوفك وين أشوفك أنا يا غزال

محمد نعيم : فوق الجبل . وسط الخضار . شم النسيم . فين يا غزال
المرددون : وين وين أشوفك وين أشوفك أنا يا غزال
محمد نعيم : آه لابسك الحجل . سايقه العقل . فات الإبل . وين الغزال
المرددون : وين وين أشوفك وين أشوفك أنا يا غزال
محمد نعيم : وى لابسك الجديد الفين جديد الواد جهيل وين الغزال .
المرددون : وين وين أشوفك وين أشوفك أنا وين الغزال
محمد نعيم : وين صوت الحيل وصت الخضار شم النسيم . كيف يا
غزال

وي أدور أنا مالي بيه / غيرك ما بدور . ولا في الكون
أزور انت يامليك حياي يا غزال
ووى فنان الحجر ولا فنان الرموش جذاب القلوب
وين الغزال

ياالماشيه البحر لابسك الخفيف ذي الزراف . وين يا غزال
المرددون : وين وين أشوفك وين أشوفك أنا يا غزال
(وتشتد بعد ذلك رقصة "الببوب" بالكرباج .. مع دخول
العريس وسط الحلبة والكل يجامله بأن يضرب لأجله
بالكراييج التي تسيل الدماء ، عند دخول كاتول يلتقط
أنفاسه بصعوبة ، يرتقي على الأرض ويتحلق حوله الجميع)
الشيخ : (يأخذه في حضنه) هاتوا شوية مويه بسرعة

عثمان : المويه يا شيخ هاشم
الشيخ هاشم: (يسقيه) اشرب يا أخي . أخبرني إيه بيك . واسمك إيه .
وجاي منين .
كاتول : أنا كاتول . من حلايب
عثمان : كاتول إحنا نعرفه .. كان جارنا في جبل عليه .. ويامسا
دوخ الانجليز وضللهم في دروب الجبال دا بطل .
الشيخ هاشم: أنا أسمع بيه : من زمان إيش جرى يا كاتول إيش بيك
كاتول : من أبو رماد وهم ورايا (يتكلم بصعوبة)
الشيخ هاشم: مين اللي وراك . اتكلم كاتول . مين اللي وراك .
كاتول : البقارة يا شيخ ، الدراويش عايزين يقتلوني بعد ماتو هتهم
في الجبال انتقام لئاسنا في حلايب وأبو رماد ، نازلين حوق
وقتل في أهلنا وعيالنا وبيأخدوا إبلنا وبهايمنا ، مجانين محدش
عارفهم عايزين يحاربوا الانجليز ولا يحاربوا ناسنا .. (يفقد
الوعي)
عثمان : كاتول . كاتول . دا فقد الوعي .
الشيخ هاشم: (يكبر في أذنه) هات حطب يا ولد نقيد ليه عشان يملك
بدنه .

كاتول : (يفتح عينيه) ما فيش وقت . امشوا من هنا . زماهم
جاين . قريب من هنا ، بالله تمشوا . لموا عيالكم وبهاكم
واهريوا .

عثمان : ما يجوز نسيك . وانت على الحال دا يا بطل
كاتول : مفيش وقت . بالله تمشوا وتحاطوا البير . وتحافظوا ع
المويه . لأنهم لو ملكوا البير هتموتوا بالعطش . هيقتلوكم
كلكم . همه عايزين البير والإبل . دافعوا عن البير حتى
آخر نفس فيكم . ولو ما قدرتموش إردموه . عشان يموتوا
بالعطش . إوعوا قملوا البير . فاكرين . حصنوها . دافعوا
عن البير . إوعوا قملوا البير . فاهين . سامعين (يرتقي
على الأرض مغشياً عليه .. ينصرف الباقون ويحمله
الشباب إلى الخارج)

الطبعة الخامسة

والأخيرة

(تعويذة النصر)

(يتجمع الرجال حول البئر ويفردون شيلاتهم البيضاء
حيث تسقط عليها الإضاءة الزرقاء وعلى إضاءة الأسترا
يتمتمون بالذكر والتعاويد لتحصين البئر وذلك في حراسة
الشباب المسلح بالسيوف والخنجر حيث يترل الرجال
كاتول عند البئر ويواصلون التعويذة)

أصوات جماعية : يارب هم وبآلهم عجل بالنصر
وبالفرح

خصيم السوء يعالجني هلاك راح عن

مهج

رجالنا عجلوا بالمسير هيا بينا

زاروا الهادي البشير
ندعوا الله يا بصير
ندعوا المولى النصير
طول باع القصير
يا نبينا
يا نبينا
هيا بينا
يا نبينا

.....

في حدودنا وشرعنا
مصر المؤمنه
يا صاح قم بنا
ندعوك بالاربعة
مصر المؤمنه
والسور الميه
والملايكة الستة
أوتاد الارض
أهل الله ضرعنا
بأهل الله
لزيارة أمنا
والكتب الاربعة
بأهل الله
والعشرة والاربعة
والكرمه الاربعة
في جبال اربعه

(ويستمر الذكر وتلاوة الأوراد لتحصين الوطن من
الأعداء حتى أنهم بإشارة من الجنند يتركون البئر وفي هذه
الأثناء يدخلون البقارة يجرون وراءهم إحدى النساء
وخلفها سيدة عجوز وطفلة صغيرة).

القائد : أخيرا وصلنا البئر ، والله عال . دول غطوه لنا

جندي ١ : خايفين من الفيران

القائد : ارفع الشيلان دي يا زول
جندي ٢ : إيدك معايا ياللا أسرع (يرفعون الشيلان البيضاء عن البئر
فتحدث المفاجأة أن كاتول به النفس والمفاجأة مذهلة
وتحدث لحظة صمت تشبه صمت القبور)
القائد : (يهز رأسه بأنه هو) هو هو
(الجميع يطأطئون برؤوسهم بالموافقة . القائد يعطي إشارة تعني رفع
الغطاء العينين عن الأسرى)
المرأة : كاتول . كاتول زوجي حبيبي (ترقمي في حضنه)
العجوز : كاتول ولدي
البنات : أبي أبي
الجندي ٣ (يمنع الطفلة والسيدة العجوز)
كاتول : (يتفحص الجميع) ما قدرتش ع الحمار . تقدروا ع
البردة
الزوجة : كاتول أنا فداك . فداك نفسي
كاتول : خدي بالك من اللي في بطنك .. وشدي حيلك . يا قائد .
انت يا قائد
القائد : عايز إيه
كاتول : سيبوا الحريمات والبنات . وأنا أشد حيلي . وأدلكم على
كل شيء

القائد : عايز تضحك على دقننا تاني يا تعبان . بعد إيه إحنا فقدنا

نص القوة . ماتت من العطش في الجبال بعد ما توهتنا .

كاتول : خلاص اقتلوني وسيبوهم دول حريمات ما ليهم ذنب

القائد : أنا هاسيح جسمك بالنار مش حاقتلك .. أما دول . الدور

جاي بعيدين .. خدوهم بعيد .. هاتوا الحطب .

(الجنود يسرعون ويلمون الحطب إيذانا بإشعال النار في كاتول

(

كاتول : فداكي نفسي يا حلايب . يا مصر يا أمنا الحبيب (يلفظ

أنفاسه)

الزوجة : (صارخة) كاتول . كاتول

القائد : مات الملعون ، وليكن ، قيدوا الحطب .. ولعوا النار في

جثته

جندي ٤ : النار ما تدق في الميت .

القائد : خليها تشوي جلده .. خليه يتعذب ذي ما عذبنا

الزوجة : كاتول . كاتول . يارب .. يارب لطفك

(في هذه الأثناء ما إن يهم الجنود بإشعال النار بمشاعل في أيديهم

حتى ينقض رجال البشارية والعباده على البقارة بالخنجر

والسيوف ويقضون عليهم)

الزوجة : كاتول . كاتول ..

(يحمل الرجال جثة كاتول ويهموا بالخروج)
الزوجة : كاتول . كاتول .. (تقع على الأرض تلف حولها النساء
فتضع في وسطهم مولودها فتسحب بقية الشيلان التي على
الجثة ويلف بها الطفل مع صرخات المولود)
سيدة : (بابتهاج تعلن) ولد . ولد . كاتول
هاشم : سموه كاتول . كاتول حي
السيدات : (يطلقن الزغاريد ويحملن الطفل على الأسترا البيضاء
فليف الرجال بالجثة دائريا وتلف السيدات بالمولود داخل
الحلقة ، وتغنى بصوت الأطفال أغنية الختام ، على دقات
الطار مع الهون)

البقارة ... قاموا بغارة
على عربان .. ساكنه صحارى
عملوا خسارة .. بقروا بكارة
خربوا دياره
والصلاح عملوا إخارة
قام إعصاره
والدخان سوى استاره
تعمي الناضر والنضارة
قاموا كواسر

قلب جسارة
من بشاريه ومن عباده
رب عباده
حارس حاسر
حصر العادي
رب عباده
شل أيادي
جانب النصر
للبشاريه والعباده
نسل فراعنه عربان مصر

(يتزلون بالأغنية إلى الصالة وسط الجمهور)

✿ أغنية الختام من أشعار مؤلف النص .

ختام



عروسة المولد

درامة حياتية وطقوسية

تجربة إبداع جماعي

فكرة وتأليف أحمد الليثي

يناير ١٩٩٩م

الشخصيات :

- ١ - العمدة : ٥٠ سنة ، ذا نفوذ واسع .. داهية وظالم
- ٢ - شيخ البلد : ٥٥ سنة ، ابن عم العمدة ، جشع وطماع وفتنة
- ٣ - أمجد بيه : ٦٠ سنة ، نائب الدائرة ، صاحب أملاك ونفوذ ، جاهل
- ٤ - صالح : ٦٥ سنة ، شيخ غفر سابق ، ميسور الحال ذا خبرة ودراية .
- ٥ - الفولي ، ٥٠ سنة ، صاحب نصبة شاي ، رقيق الحال ، طيب ودود .
- ٦ - سالم ٣٥ سنة متعلم ثائر ، أخو شيخ البلد ، طموح الفكر .
- ٧ - عليوة ٤٥ سنة صديق الفولي فلاح مرح ومسلي
- ٨ - الشيخ عبد اللطيف ٦٠ سنة ، مؤذن مسجد قليل العلم ، موالس ومداهن .
- ٩ - المزين ، ٤٠ سنة قروي يجيد قص الشعر والطهور
- ١٠ - مجموعة الشباب : من شاب ١ إلى شاب ٥ ، أعمارهم ما بين الخامسة والعشرين والثلاثين ما بين التعليم العالي والمتوسط ، لهم أفكار تقدمية .
- ١١ - صابحة : ٢٥ سنة ، بنت الفولي متوسطة التعليم خطيبة سالم
- ١٢ - الأم : ٤٥ سنة ، طيبة القلب زوجة الفولي خائفة ومستسلمة
- ١٣ - الداية : ٦٥ سنة ، عجوز تجيد التوليد والرقى وأمور السحر والعلاج البلدي .
- ١٤ - مجموعة الغفراء : من غفير ١ إلى غفير ٣ أعمارهم ما بين الأربعين والخمسين ، غفر العمدة .
- ١٥ - مجموعة الصبية : أولاد وبنات ما بين العاشرة والخامسة عشر يقومون بالتشخيص .
- ١٦ - فلاحون ، فلاحات ، صبية وأطفال بانعو عرائس المولد .

اللوحة الأولى

(في ساحة القرية حيث يتكون تدريباً المولد الشعبي ، الذي يشارك فيه الكبار والصغار حيث يتم البيع والشراء والفرجة على ألعاب الحوالة والأرجوز ، وعربة النيشان ، والعرائس)
(حيث يزور المولد ويشرف على نظامه العمدة وغفره ، ولقاء للشباب حيث الأطفال يلعبون العبات الشعبية المشهورة بالمنطقة ، يلتقي سالم وصابحة من أبناء البلدة ويرقبونهم مجموعة الشباب أصدقاء سالم وحيث يتم التراسق بالعبارات المرححة المازحة)
الأطفال (بنات وبنين يلعبون في المولد) :

واحد اتين سرجي مرجي .. انت حكيم ولا تمرجي
أنا حكيم الصحية .. إلعان أديه حقنة
والمسكين أديه لقمه
نفسى أزورك يا نبي .. يا لي بلادك بعيده
فيها أحمد وحميده .. حميده جابت ولد
سمته عبد الصمد
حطته ع القاية ، خطفت راسه الحداية
حدّ حدّ يا راس القرد انت ولد ولا بنت
صاحبه : (تشترك في العبة) بت يا أولاد بت
سالم : (يشترك مغازلاً) ولد يا بنات ولد
صبي ١ : ولد ولا بت يا عم سالم .
سالم : البت ذي الولد
صبية ١ : البت أحسن م الولد
صبي ١ : الواد أحسن م البت
صبية ١ : البت أحسن
صبي ١ : الواد أحسن
صبية ١ : البت بقول لك
صبي ١ : الواد أحسن لأخزقلك عنيكي (يشتد المولد ويستمر دوران
الأهالي)

صبية ١ : حتشخصوا النهارده يا عم سالم
سالم : طبعاً حنشخص .. هه يا للا يا جماعة نويين
مجموعة الشباب : نويين على إيه
سالم : نحكي الحكاية
شاب ١ : وانت هتتعرف تحكيها
سالم : طبعاً ها عرف لأني عشتها أكثر منكم ، ولأني الوحيد المتعلم
فيكم علام عالي .
شاب ٢ : ليه هو انت عمرك كام سنة ؟ دي حكاية من قبلك بكتير .
سالم : مهو أنا يا بني ، عشتها ، أو تقدر تقول كده عشت بعضها
والباقي التحكالي وعشته بخيالي يبقى برضه عشته .
شاب ٢ : طب إذاي دي تيجي ، إذاي التحكالك وإذاي عشته
سالم : إللي عشته أنا عارفه ودارسه ، وإللي التحكالي عشته بخيالي يبقى
برضه عشته ، إفهمت .
شاب ٢ : افهمت ، إنت حتتفلسف علينا ، يا أخي كلمنا عربي
شاب ٣ : بس يا أهبل إنت ، إنت مش فاهم حاجه خاص
شاب ٢ : اخرص قطع لسانك ، إني مش أهبل ، إني متعلم ذي ذيك
بس هياش الظروف الوحشه إللي ذي وشك ، مختليش
أكمل علامي (ييكي بحرقه مصطنعة) .
شاب ٤ : عاجبك كده أديك قلبت السهرة غم ، يعني إحنا ناقصين

شاب ٣ : (لشاب ٢) متزعزلش يا وله ، يا سيد حقك علي ايني مقصدهش .

سالم : لأ ، تقصد لأن أهبل دي ، هو الحكم الأخير بتاعه

شاب ١ : هي مين دي اللي بتكلم عنها

سالم : ما انت عارفها بس بتستعبط

شاب ١ : واد انت يا شاعر انت ، إحنا والنبي مش ناقصين جنائك هي مين دي ؟

شاب ٣ : الحكاية دي أصلها جديدة لنج

شاب ٤ : لأ دي الظاهر قديمة قوي ، متوعاش عليها ، لا انت ولا هوه ولا أبوكم ولا أبوي كمان .

سالم : كذاب في أصل عينك ، قديمة جديدة ، إحنا نوعاها كويس

شاب ٢ : طيب ما تحكي يا فالخ ولتخلصنا ، طلعت روحنا

شاب ٤ : يعني حيحكي ف إيه يا خي ، في أبو زيد الهلالي ، أهى .. هية

.. هية ، نفس الحكاية ، نفس الوشوش ، نفس البيوت

والناس هي نفس الناس ، يعني إلی نبات فيه نصبح فيه .

شاب ٢ : لأ مش هي هي

شاب ٣ : أيوه لو هي هي ما كناش جينا إحنا

شاب ١ : ولو هي هي ما كنوش جم ولادنا

سالم : كل شيء يتغير ، دوام الحال محال ، إحنا في عالم أغيار

شاب ٤ : أغيار ؟ أغيار دي يعني لمو أخذه ، أخيار ؟ ولا أشرار ؟

شاب ٢ : الاتنين ، الاتنين سوا ، ده وده

شاب ٣ : إيه ده ، إيه الخلاوة دي ، لأ فاهم يا وله ، شهدنا لك والله
ده وده فهمتوا حاجه .

شاب ٢ : وبعدين معاك ما اتلم لسانك أحسن لك

سالم : استنوا ، استنوا الوحي ، الوحي

شاب ٤ : أهى نقحكت عليه الجنونه ، هاتوله ورقه وقلم يكتبها لحسان
تطير .

شاب ١ : مهما كتب ولا حد حيحيس بيه ، حقاش يروح بيها مصر .

سالم : أصل الحكاية أصل ال .. ال ..

شاب ١ : تاني الحكاية ، حكاية إيه

سالم : كايتنا إحنا

شاب ١ : هو إنت اليومين دول ، بتكتب حكايتنا إحنا ، يا دي
الفضايح .

سالم : لأ مش حكايتنا إحنا إحنا ، (مشيرا إلى زملائه) لأ دي
الحكاية الكبيره الكبيره قوي ، وإحنا يدوب متفرجين .

شاب ٢ : يعني إيه ؟

سالم : يا بني أنا أصلي عشت ودرست ، افهمت من ده حكاية ومن
ده كلماية ، ومن ده داهيايه ، وشبكت الخيوط مع بعضها

،

شاب ٣ : دا انتي إللي باين خيوط مخك ضربت .

سالم : افهم يا ابني ، مهو خيط جنب خيط ذي خط جنب خط جي

خطوط الغيط

شاب ١ : خطوط الغيط ، انت هتلمس مخنا ، إيه اللي جاب الغيط

والميه هنا ؟

سالم : أصل الحكاية فيه ناس ، خططوها ، وناس لعبوها ، وناس

بعرقهم وبدمهم دفعوا تمنها وطبوها ،

شاب ٤ : إيوه وناس ضرورها وناس نفعوها

شاب ٢ : يا اثمار أسود انت اتعديت منه

شاب ٤ : عدوى الفكر ظاهرة صحية يا جاهل

شاب ٣ : فعلا فيه ناس ضرورها ، وناس نفعوها ، وناس باعوها ، ي

وناس اشتروها .

شاب ١ : عال عال أهى كملت وانت كمان اتعديت ياللا اما أخش في

اللعبة ، وناس شالوها ، وناس حطوها (يؤدون لعبة شعبية

(

سالم : الله ينور ، (للجمهور) مش قتللكم أهم خلاص فهموها

شاب ١ : وناس رفعوها وناس نزلوها

سالم : غيره غيره إلهي بعده

شاب ٢ : وناس حيوها وناس كرهوها

شاب ٣ : وناس غطوها وناس عروها

شاب ٤ : وناس ربحوها وناس تعبوها

سالم : وناس خسروها وناس ربحوها

شاب ١ : عشقوا تراب أرضها ، وناس من أرضها من بحرها من جوهها

من شرقها من غربها من ضهرها من بطونها فحتوها

وشحتوها .

مجموعة الشباب : وناس حلال يندفونوا في تراها وناس حرام يندفونوا فيها

(يتزلون للصالة)

سالم : ناس ف حكايتنا النهار ده إلهي إحنا منها وانتوا منها ، أيوه

انتوا منها ، الحكاية حطلع من وسطكم واحد واحد ،

إلهي شارك فيها زمان ، وإلهي لحد النهارده قاعد بيتفرج

عليها .

شاب ١ : إحنا مين ؟

شاب ٢ : فراعنة ولا عرب ؟

شاب ٣ : فلا حين ولا صعايدة ؟

شاب ٤ : تراكوه ولا شراكسة ولا إيه ؟

سالم : مع بعض ولا ضد بعض

شاب ١ : اخوات ولا عدوين

شاب ٢ : قابيل يقتل هابيل

شاب ٣ : وست يقتل أوزوريس المهم

المجموعة : كله قتل

شاب ٤ : قتل فكره ، قتل رأي ، قتل حد أي حد مش مهم بإيه المهم

؟ ..

المجموعة : كله قتل

سالم : حسن يندبح بالسكين

شاب ١ : ياسين يتقتل من فوق ظهر الهجين

شاب ٢ : وأدهم يموت بالغدر والخيانة من خله مش مهم

المجموعة : كله قتل

شاب ٣ : مش مهم بإيه بموس ولا سكين ولا سم .. ولا طلقة بندقية .

شاب ٤ : ولا سكين أو بخنجر المهم

المجموعة : كله قتل ، واتفرج يا سلام على أصل الحكاية مسن زمان

للهارده حنشخصها معاكم وانتوا كمان حنشخصوها معانا

واتفرج يا سلام

بلاك

اللوحة الثانية

((منزل القولي ، يطل على رهبة واسعة ، ساعة شروق الشمس ،
الاستعداد لختان المولود ابن القولي ، الأم ، صابحة ، الداية ، المزين ،
عليه ، صالح والشيخ عبد اللطيف والشباب والمعازيم))
صابحة : (مستيقظة) صباح الخير يا امه
الأم : خير صباحين يا ضنايا
صابحة : نوبين يا امه تطاهروا أخويا برضو دلوقتي ع السابع يا امه
الأم : مهو كل دين ، عزه
صابحة : يا امه لسه صغير ، بلاش والنبي

الأم : يا بت كل مكان بدري ، كل مكان زين للعليل ، يخلي يومه

بيومين .

صابحة : والنبي ما انا عارفه إيه ؟ قلبكوا حاجر ؟

الأم : طيب ياللا ورانا شغل كثير النهار ده ، وزمان أبوك جاي وجايب

المزين معاه .

صابحة : المزين ؟ ما بلاش حكاية المزين ده مش كان الدكتور أحسن

الأم : دي عوايد يا بت

صابحة : دكان زمان وجبر ، المزين يا امه

الأم : طيب انكتمي ، لحسن أبوكي يكون جاي ويسمعنا

صابحة : وهيعمل إيه يعني ؟

الأم : هيزعطنا من البيت ، علشان بتتحشري في اللي ما لكيش فيه

صابحة : ليه يعني ؟ هو أنا صغيره ولا صغيره ، دا أنا أديني دلوقتي أكمل

خمسه وعشرين بالكمال والتمام

الأم : ربنا يريح قلبك ، يا ما نفسي أفرح بيك في بيت العدل

صابحة : ليه يا اختي ازهقتي مني ولا إيه ، لسه بدري قوي

الأم : يا بت إللي فسنتك دايره الخطاب عليهم ، يا بت الجواز ستره

صابحة : أنا مش حتجوز أديني قلت لك مش حتجوز ، عارفه ليه يا مه

الأم : ليه يا خاوية

صاحبة : أنا مش هتجوز إلا لما أخويا حسن يكبر ويبقى راجل وملو
هدومه ويمشي ورايا في الزفة ، ويضرب لي نار من بندقيته
الأم : (تضحك) يا هيلك يا هيله ، طب ياللا همي وبلاش فلقة
دماغ ، (أصوات من الخارج) سامعه حس أبوك بره مع
الرجالة يا للا همي شوية يا صاحبة (تحتفيان في الداخل)
الفولي : (يدخل مع جمع الأهالي) أهلا وسهلا ، أهلا وسهلا ، أهلا
وسهلا رجالتنا ، عقبال عندكم جميعا يا إخوانا عقبال كده ما
انجاملكم في الأفراح
الجميع : مبروك يا فولي ألف ألف مبروك ، يتربى في عزك عقبال ما يكبر
واتجوزه يا فولي
الفولي : كتر ألف خيركم ، وما نجيلكمش في حاجه وحشه أبدا
عقبالكم .
عليوه : انت يا واد يا فولي ما سكلنا عقبالكم عقبالك ، احنا حنطاهر
تاني يا وله ، الله ينجيك راجل
الفولي : عقبال ولادكم يا عليوه يا أخي ، ما اتاخذونيش تطاهروا
عيالكم يا سيدي ، واللي ما تجوزشي يتجوز عقبالك يا سالم
أفندي (يخرج لبرهة) .
سالم : يا رب يا عم الفولي يا رب ، من بقلك الحلو ده لباب السما

صالح : (يضحك) شوف الواد يا خويا سمع سيرة الجواز من هنا وزاد

النص والفرحة مش سيعاه

عليوه : ألف مبروك يا فولي .

الفولي : (يدخل ومعه المزين) ادخل يا مزين الغبرة

المزين : هقعده هنا يا فولي .

الفولي : أيوه هنا يا خفيف .. جهز العدة ولم النقطة

المزين : طيب اتحفنا بالشربات الساقع قوام

الشيخ عبد اللطيف : والله ما ساقع إلا حضرة جنابك ، يا مزين الغبرة

عليوة : أيوة والله تو ماجلو حيرطب يا رجالة

المزين : وبعدين في المقلقة دي آمال ، خلونا نشوف شغلنا

صالح : شوف شغللك يا أخويا ، وانت موسك حامي منشار مش عاتق

بني آدمين ، حمير ، على ودنه

عليوة : لأ وإيه انتوا مادرتوش ، مش بقى بسلامته منشد وبيأخذ ليالي

لحسابه .

المزين : طيب وماله مهكله أكل عيش .

الشيخ عبد اللطيف : وده مين اللي انطرش إللي يسمع البأف ده

المزين : البأف ده إللي مش عاجبكم بتسمعه عمدا البلاد والناس

العليوي قوي .

صالح : عليوي في عينك يمكن ما يعرفوش حضرة جنابك إنك مزيين،
مغشوشين فيك

المزين : أصله إحنا كده ، بت الدار عورة
عليوة : لأ وانت الصادق حمار الحلي ما يسليش
صالح : طيب خد واستفتح ياللا وسمعنا صوتك ، بس من غير ما اطلع
لسانك إللي عامل ذي جلفة الموس
المزين : من يد ما نعدمها ، وصالح شيخ الغفر الزماني بينقط بخير وعقبال
عنده ، وخلف الله يا محبين .

عليوة : (يتقدم ويعطيه نقود) خد ليه ولسالم أفندي .
المزين : وعليوة ابن خاليت ستوته بينقط بخير وعقبال عنده وخلف الله
يا محبين (يعلو صوته) وسالم أفندي ابن عم العمدة بينقط
بخير وعقبال جوازه وخلف الله يا محبين .

الفولي : خد يا مزين ام الواد واخته
المزين : وام العريس حرم الفولي واخته بينقطوا بخير وخلف الله يا محبين
الشيخ عبد اللطيف : حرم الفولي ، حرم الفولي قال حرمت عيشتك يا
شيخ انت والفولي .

الفولي : ليه كده يا مولانا إحنا حنبدأ في الهبش من دلوقتي خليككم شاهد
، شوفوا مين يجر فهاش مين .
عليوه : مبروك يا فولي إنت والست حرمك

الفولي : وانت كمان يا عليوة مقبولة منك يا ابن والدي
شاب ١ : ألف ألف مبروك يا عم الفولي .
شاب ٢ : يتربى في عزك يا أبو صابحة .
شاب ٣ : صابحة دي إيه أبو حسن يا ولد
عليوة : وعقبال كدة لما يكبر ، واتشوفوا كده ذي إل .. إل .. ذي
الشيخ عبد اللطيف .
عبد اللطيف : وماله بقى الشيخ عبد اللطيف يا أبو نص لسان ، مش
عاجبك
الفولي : سيدنا وتاج راسنا هو حد يقدر يقول حاجة .
صالح : الشربات يا فولي ، ما تعجل يا راجل ريقنا نشف .
عبد اللطيف : دانا ولا كلامي إلهي نشف ريقك يا شيخ الغفر المخلوع
ولا إيه ؟
صالح : اللهم اخذيك يا شيطان ، يا راجل انت ، حد داس لك على
طرف ؟
الفولي : (يظهر والجميع يضحكون) الشربات يا رجاله ،
ما تضحكونا معاكم إيه الحكاية ؟
عليوة : إلا قولي صحيح يا فولي ، ساعة إلهي في إيدك دي ولا منه ؟
الفولي : لأ دي منه يا خفيف ، (يفهم المغزى) المنبه غلطان ، المنبه
غلطان يا عمده .

عبد اللطيف : وبعدين معاك يا فولي ، اعقل امال ماتضحكش علينا
العيال .

سالم : عيال ، عيال دا إيه ، (الجميع يضحكون) استنوا استنوا إيه
بقي حكاية المنبه يا عم الفولي ؟
عبد اللطيف : يا عم الفولي ، يا عم الفولي قال ، عمي الدبب (الجميع
يضحكون)

شاب ٢ : والنبي والنبي لاتحكيلنا حكاية المنبه دي باين عليها حلوة قوي

عبد اللطيف : حلوة قوي ؟ ما تقعد يا واد انت كده اقعد واتأدب أمال
وانت عامل كده ذي فرقع لوز .

شاب ٤ : صراحة كدة ، ما كنش واجب يحصل منك ده يا مولانا .
عبد اللطيف : (مستغرباً) هو إيه واد انت ، إللي كان واجب وإللي ما
كنش واجب ؟

الفولي : عيب يا اخوانا ما يصحش كده .
عبد اللطيف : عاجبك كده يا سي الفولي .
الفولي : هو أنا لسه فتحت خشمي ، دول بيخرجروك في الكلام يا
راجل .

شاب ٥ : أي والله حكاية المنبه دي تنفع سيما ، آكشن ، كلاكيت أول
مرة .

صالح : سيما مرة وحده ، إيه حتشخصوها دي رخره كمان ؟
شاب ٤ : والنبي والنبي لتحكيها يا عم الفولي ، إنت كده شوقتنا .
عليوة : ما تحكيها بقى يا فولي وتخلصنا هو إحنا حتتحايل عليك .
عبد اللطيف : يا واد يا عليوة اهدد امال واقعد على حيلك ، ما تقول
حاجة يا صالح ، عاجبك الفضايح دي ؟
صالح : ماتكبرش الحكاية قوي ، ما تضحكش علينا الشباب
الشباب : عايزين نسمع ترررم ، لازم تحكي ترررم
عبد اللطيف : ترررم ؟ والله عال دول حيلحنوها ، أما أقوم أمشي ،
ماحنا بقينا مسخرة وسط العيلة .
عليوة : (يغمز المزين بالنقود) .
المزين : الشيخ عبد اللطيف ، مؤذن الجامع ، أبو منه بينقسط بخر
وعقبال عنده .
عبد اللطيف : لأ دي بقى زادت قوى ، مش ناقص كمان إلا المزين (يهم بالخروج) .
صالح : ما تقعد أمال يا عبد اللطيف ، العيال بيضحكوا معاك يا
راجال .
عبد اللطيف : يعني إنت بقى موافقهم على المسخرة دي يا صالح ؟
سالم : تاهت ولقناها أحسن واحد يحكي الحكاية أبويا صالح .
عبد اللطيف : حتى انت كمان يا سالم ياللي بنقول عليك عاقل .

سالم : ما تحكي يا با صالح خلي مولانا يهدى شوية .
عبد اللطيف : (يضحك) حاهدي ، حاهدي يا مشخصاتي ، احكي يا
صالح وفرح العدوين فينا .
صالح : احكي إيه بس الله يجازي شيطانكم ، أقول إيه بس ، من
عشرين من ثلاثين سنة كده عبد اللطيف إلهي وسطيكم كلن
لسة متعين مؤذن للجامع البحري وانا كنت يومها لسه متعين
شيخ غفر جديد في البلد ما احنا من عمر واحد يا اولاد مش
كده يا عبد اللطيف .

عبد اللطيف : لأ يا خويا انت أكبر مني بخمس سنين .
صالح : يا راجل يا راجال دانت إلهي مغالط الحكومة ف يجي عشو
سنين ما علينا ، في يوم من أيام الشتا الباردة اللي تنشف
العظم الناس لا ليها ولا عليها رايحه تأدي فرض ربنا ، قايمه
تصلي صلاة الفجر ، اتفاجأوا بإن الجامع مقفول ، تنهم
واقفين ومصلوبين هنا عبد اللطيف يفتح ، هنا يجي أبداً لحد
ما الشمس طلعت وملت الدنيا والجامع مقفول ، خدوا
بعضهم وبلمة المعلم وراحوا اشتكوه عند العمده وانا كنت
قاعد ، قال العمده قوم يا صالح شوف لي حكاية عبد اللطيف
ده إلهي مش حييها البر ، دي تالت شكوى السنادي تجيني

فيه ، مرة كان عيان ، ومرة المدام كانت بتولد ، ومرة أبوه
مات شوف النوبة دي إيه اللي حصل (الجميع يضحكون)

شاب ه : يعني مش أول مرة يلقوا الجامع مقفول

عبد اللطيف : انكتم يا وله واسمع وانت ساكت .

صالح : نهايته قمت أنا والغفر ورحنا له البيت ، يا عبد اللطيف لحد
ماحسي اتبجح أتريه بسلامته كان نايم بص من الشباك مسين
بينادم على عبد اللطيف ، يا فتاح يا عليم ، قلت له كلم
العمده عايزك في المنضرة دلوقتي حالاً ، اتنفض وقال لي هيا
الساعة كام قلت له الساعة سبعة الصبح راح رازع الشباك
في وشي ، إن هنا يطلع ولا هنا يجي أبداً . إلا وسمعت خبط
ورزع وشتيمة من اللي يجهاها القلب قلت بيشتم الوليسة ولا
بيضرها ولا حاجة الله يخبيك يا عبد اللطيف ، فتح الشباك
وهو بيقول ، أقول إيه للعمده دلوك ، أقوله أنا الغلطان ولا
انت ، أروح أقوله المنبه غلطان يا عمده وراح راميهِ ميت
حته في الشارع وقال لي اسمع يا شيخ الغفر لمه وخده ع
العمده وقول له الشيخ عبد اللطيف النوبادي مش ذنبه مش
غلطان قوله المنبه غلطان يا حضرت العمده ، المنبه غلطان والله
(الجميع يضحكون) .

بلاك

اللوحة الثالثة

(يضاء المسرح على بيت الفولي .. حيث أداء طقوس السبوع للمولود

حيث الأم ، صابحة ، الداية)

صابحة : (تدندن على أغنية شعبية)

يا جوهرة بين عقودي ، يا رمش عيني اليمين

والبسك بدلة قصب وأركبك ع الهجين

يا جوهرة بين عقودي ، يا رمش عيني الشمال

والبسك بدلة قصب وأركبك ع الحصان

الداية : (من الخارج تنادي بصوت عال)

يا صابحة يا صابحة يا بت الفولي

الأم : شوفي مين يا صابحة عينادم
صابحة : استني ياما لما أبخر ضي عيني
الأم : يا بنت انتي اقبلتي ، شوفي مين
صابحة : طيب ، طيب ، مش أخوية يا ما وخاف عليه من الحاسدين .
الأم : على إيه يا حسرة حيسدون ع القراطين العممي ولا نصبة
الشاي إللي حلتنا .
صوت : يا صابحة انت يا بنت يا صابحة .
صابحة : طيب ، أنا رايح افتح .. غطي غطي ، خبي خبي .
الأم : يا بت همي شوية .
صابحة : (تذهب للباب ثم تعود بلهفة) اوعاكي ياما تنسي البسملة ،
وصلبي بالكحل ما بين الحواجب كده ، كده (تؤدي الطقس
(،واتعذبني من فعل شيطان رجيم ، (تخطو للباب ثم تعود
مسرعة) ولا أقول لك اقربله في سورة الفلق دا الصخر م
العين اتفلق ، ولا أقللك خدي لبسيه ياما حلق وقولي بست
أوعاكي ياما تقولي ولد .
صوت : (الداية من الخارج) هتفتحوا ولا لسه نايمين يا بيت القولي .
الأم : يا بت افتحي الله لا يسئك .
صابحة : خشي خشي يا خالة برجلك اليمين
الداية : بسم الله الرحمن الرحيم ، كده تلتعيني ع الباب كل ده ؟

صابحة : كنا بنحمي أخويا يا خالة حُسنة
الداية : حموم العوافي ، حترغري ولا أزغرت آني .
صابحة : (تمنعها) لأ بلاش يا خالة ليحسدوه .
الداية : واعية وناصحة زي أبوكي ، طب فوني هاتي الغلة والغريال
وناولينني الهون النحاس ، وهاتيلي نايبني حقي ناشف .
الأم : العيون ليك يا خالة حسنة يا وش الخير يا قدم السعد .
صابحة : جاهز يا خالة .. كل شيء جاهز (تحضر الغريال والهون) يا
غاليه .

الداية : يغلي مقدارك يا ام لسان بينقط شهد يا ست البنات . اقعدي
، اقعدي جنبي ودقي الهون كويس ، وانتي ياللاقومي يا اختي

الأم : أقوم أعمل إيه بس يا خالة .
الداية : يا اختي قومي وارمي حملك ع الكريم وقولي يا رب .. خطي
ياللاً (ترش الملح فوق رأسها وفي أركان البيت وتؤدي
طقوس السبوع) الأولى بسملة والثانية بسملة من عين أمك ،
من عين أختك ، من عين أبوك ، من عين القوم اللي شفوك
ولا صلوش ع النبي ، العين اللي تحق تطق والعين اللي تحسد
تفسد ويبلالها بعمها ، رقيتك رقيتك ومن الله استرجيتك

بالصلاة ع النبي رقيتك رقة رقة ، رقة وكل رقة فيها
تقوة بالصلاة ع النبي مفارق .. مفارق ،
يفضل في باطك ولا يفارق
وحجاب من جلد الحوت
والرضعة من لبن التوت
رضيعه ثلاث رضعات ثلاث ادنات ..
سميه ثلاث تكابير
ونزليه وانزلي بيه غويط البير
ونطحيه سبع حيطان ، سبع يبيان
ولقي بيه سبع عتبات ، ولقي بيه سبع لغات
ولمي البسملة والبسملة سبع لمات
سبع غلات ، سبع ضمات ، من كل حبوب الزرعات
(تنتقل الإضاءة إلى أمام دار العمدة حيث العمدة والغفير
وشيخ البلد)
العمدة : (ماسكا بالتليفون) إيوه ياباشا سامع ضرب نار هنا في
النواحيدي هنا عندنا ، مش نايم ولا حاجة ، داني حتى مفنجل
عنية ع الآخر ، حاضر حاضر متزعلش يا باشا حاشوف
الحكاية ، طبعاً حشوفها ، اهدى بس سعادتك واطمن على

الآخر ، حالا .. دلوقتي حالا (يترك السماعة ، ويذهب

ويجيء أمام الدوار قلقا في حيرة بالغة)

العمدة : يا واد يا غفير ، اتن يا واد يا غفير انت وهو ، انتوا يا شوية
بهايم ، يا حوش .

الغفر : (يظهرن مسرعين) خير يا سيدنا .

العمدة : البلد فيها ضرب نار امنين بقى حبيجي الخير ، ضرب هنا ف
البلد .

غفير ١ : ليه هي الحرمية طبت تاني ولا حاجة ؟

العمدة : يا مغفل بقولك ضرب نار جوة البلد مش ف الخلا وعتقولي
حرمية ، حرمت عيشتك يا بأف .

غفير ٢ : يمكن يا جناب العمدة ولا مؤاخذه تكون الحرب قامت ولا
حاجة ؟ .

العمدة : حرب إيه يا أبو مخ طاقق وقامت إيه قامت قيامتك يا شيخ .

ياللا اجرؤا قوام ، عايزكوا تمسحولي البلد شبر شبر ،

واتشفولي ضرب النار ده فين ومين وميتي ، واتبلغوني قوام

وانعرفتوا الجاني جرجروه على بطنه وهاتقولي على هنا .

غفير ٣ : والدركات يا عمدة ؟

العمدة : أيوه صحيح عندك حق يا واد طيب أنا حشوف الحياكية دي

بنفسي ، وانتوا اتنين ع الكنيسة القبلية وواحد ع الجامع

البحري ، ياللا قوام (يخرج الغفر) بلد غجر مفهاش أصول
ولا احترام للكبير ، من ميتة ولد العلافيت تمسك بنادق ؟
شيخ البلد : (بجوار العمدة) هدي نفسك أمان يا عمدة ، ماعملش
كده .

العمدة : أهدي نفسي ، يعني ماسمعتش يا شيخ البلد ، البيه زعلان
قوي .

شيخ البلد : الغربية إني الخبر وصله من قبل ما نعرف إحنا بيه .
العمدة : البلد دي مفهاش حاجة بتستحي دا البيه كمان عرف بالعيال
المشخصتيه واللي بيعملوه كل ليلة .

شيخ البلد : دي عيال طايشه يا عمدة ، احنا كمان حناخد على لعب
العيال ده .

العمدة : البركة في سالم أخوك وصالح شيخ غفرنا الزماني .
شيخ البلد : هو صالح أس الفساد هو إللي بيفتح مخهم على كل حاجة
راجل دماغه ناشفة ومش حييجيها البر .

العمدة : والأكادة قتال إيه القولي وبته كمان معاهم .
شيخ البلد : والعمل إيه يا عمدة ؟ حنسكت ؟
العمدة : نسكت ده إيه ، لازم نتصرف ، ياللا بينا .

بلاك

(تنتقل الإضاءة على ساحة القرية حيث الشباب والفولي
وصابحة وسالم والشيخ صالح والشيخ عبد اللطيف وعليوة
وقت العصاري وحولهم الصبية)

الصبية : عايزين المركب ، عايزين حكاية المركب .
سالم : (في منتصف الساحة وحوله الصبية) خلاص خلاص إحنا
حنشخصلكم حكاية المركب .

صبي ١ : أنا عايز أشخص معاكم يا سالم أفندي .
صبية ١ : أيوه والنبي يا عم سالم ، احنا بنعرف نشخص زيكم .
سالم : كدهو ، طب ياللا فرجونا حتشخصوا إيه .
صبي ١ : اني حشخص العمدة ، وانتي الغفير .
صبية ١ : اني العمدة وانت الغفير يا فالج .
صبي ١ : البت ما تنفعش عمدة .
صبية ١ : لأ تنفع عمدة .

صبي ١ : أي قلتي أنا حشخص العمدة ومش عايز حد ينطق بكلمة
وانتوا كلكم حتعملوا الغفر بتوعي ، مفهوم مفهوم يا حوش .
سالم : (ضاحكاً) عفارم عفارم ، العمدة حتة وحده ، طيب ياللا
فرجونا كده .

صبي ١ : (مشخصاً العمدة) شيلوا البنادق يا غفير انت وهو في
السلاحيك .

مجموعة الصبية : حاضر .

صبي ١ : رصوها زين ، الكرنيف من تحت السلاح من فوق .

مجموعة الصبية : حاضر .

صبي ١ : ما انا أصلي عارفكم بقر ، مخاخ زنخة ، رصوها عدل يا هنج .

مجموعة الصبية : حا حا حاضر .

صبي ١ : فاهمين يا حوش ، المولد أهو بدأ الليلة ، سامعين .

مجموعة الصبية : سامعين يا سيدنا

صبي ١ : كويس، اتنين منكم ع الجامع البحري، وتلاته ع الكنيسة

القبليّة وخمسة يفسحوا ابني العمدة الصغير ، فاهمين ؟

مجموعة الصبية : حا حا حاضر .

صبي ١ : هش ، هش (يضحكون جميعاً)

سالم : برافو ، سقفلهم يا جماعة ، طيب إيه رأيكم إحنا حنشخلصكم

حكاية المركب إللي غرقت زمان ، ها يافولي حتشخص معاند

الفولي : أشخص ما اشخصي ليه هو أنا صغير ، واني أعجبك قوي يا

سالم أفندي بس انت جربني وانا كمان بعرف أغني .

عليوة : وأنا هاعمل غفير من الغفر .

سالم : انت ها تعمل غفير انت والفولي ، وابويا صالح شيخ الغفر

مفهوم ياللا نعمل بروفه الأول .

الفولي : (يلمح العمدة قادماً هو والغفر يقفز من مكانه كمن لدغته
عقرب) القط ، القط ، القط داخل البنية .. نقى الفروجة
العتقية .

القط ، القط دخل الخزانة ، نقى الفروجة العريانة .
العمدة : هو انت يا واد يا فولي مفيش غير الهبابة دي على لسانك
جاتك النعم ، ما تقوم يا شيخ عبد اللطيف وبكفاية سهر
علشان تقدر تصحى فى الفجر .

عبد اللطيف : اتفضل يا جناب العمدة شاي للعمدة يا واد يا فولي .
العمدة : ملوش لزوم تشكر تشكر يا أبو منه (الجميع يضحكون)
عبد اللطيف : يوه، لسه فاكر يا عمدة ، عموماً مقبوله منك يا سيدي
الفولي : حدىش قاله حاجة أهى جاتلك من فوق يا مولانا .
عبد اللطيف : شايف يا عمدة حتى الفولي خليته يتنقور عليه .
العمدة : بس يا واد يا فولي بلاش قلة حيا .

الفولي : ائ مش قليل الحيا .
العمدة : طيب بس يابن دهب يا ...
الفولي : (مقاطعاً) أنا ولد أبوي مش ابن دهب .
العمدة : أبوك أبوك ده إيه ، انت ليك أبو يا فولي ، دانت لا أصل
ولا فصل .

الفولي : ما يوصلش الغلط لحد كده يا عمده ، برضه لازم يبقى فيه
خشا وحيا .

العمدة : خشا وحيا يا قليل الحيا ، وبترد عليه كلمة بكلمة يا كلب (يصفعه) .

الفولي : أنى مش كلب ما تضربنيش ، هو إيه ، انت عمال على بطال
قهي انت قارش ملحقي ليه .

العمدة : وكمان بتقاوح يا فولي ، وقدام إللي يسوى وميسواش .

صالح : مين بقى إللي يسوى ، ومين بقى إللي ما يسواش يا عمدة؟

العمدة : مين ؟ صالح شيخ غفرنا ، الله يرحم أيامك فينك يا راجل

صالح : ما تغيرش الكلام يا عمدة .

العمدة : إيه حتستجوبوني يا صالح وقدام الناس ، هيه دي الأصول
برضه .

صالح : الأصول للي يعرف الأصول ، وانت عديتها من زمان .

العمدة : هيه حصلت بقى علشان ولد هلفوت .. زي الفولي ،

بتناطحني يا صالح .

صالح : هات م الآخر يا عمده ، وقول عايز إيه من الفولي .

العمده : وإيه اللي هاعوزه من الفولي ده كمان، دالا مال ولارجال

هاعوز إيه منه .

عبد اللطيف: استهدوا بالله يا جماعه ، انتوا هتزعلوا مع بعض ما
يصحش كده (يأخذ الفولي جانباً) وانت يا واد يا فولي مش
عيب برضه ، الكبير كبير يا وله . والعمده قصدوا يضحك
معاك يا عيط .

الفولي : وأنا ما غلطش ف حاجه عيضريني ليه،لأنا سارق ولانا هب
العمدة : والله عال واعرفت تتكلم يا فولي وعقدة لسانك اتفقست الله
يرحم .

غفير ١ : ده مكانش واد اللي جالك ده يا فولي .
غفير ٢ : إيوه منيوم ماجاله سبع البرميه ، وماحدث عارف يكلمه .
صالح :مابلاش الحديث القليل ده،القول يغلبان وف حاله ولا حنعمل م
الحبه قبة،ما حناش كده نيجي في الهايفة ونتصدر
العمدة : طيب القعدة دي تتمنع يا صالح ، علشان كان فيه ضرب نار
النواحيدي .

عبد اللطيف : (متسرعاً) دول عيارين من فرده بلدي ، ضربهم الواد
الفولي ، تفاريح للولد عقبال جواز العمده الصغير .

العمدة : عيارين

عبد اللطيف : من فردة بلدي

العمدة : ضربهم مين ؟

عبد اللطيف : الفولي تفاريح للولد .

العمدة : عيارين من فرده بلدي ، ضربهم الواد الفولي ، تفاريح للولد ،
عال عال شاهدين ، (لا أحد يرد) مالكم اتخرستوا ليه ؟
سكتوا ليه ؟ طيب اقفل الغرزة وتعالى وريا يا فولي .
سالم : مش وقته يا عمدة ، الفولي حيحي وراك ، دي فرحته الليلة .
العمدة : ماشي ياسي سالم ، ماشي يابن عمي بس الغرزة دي تنفتح
بمعاد وتتقفل بمعاد ، مفهوم ؟
الفولي : ليه ليه هو احنا فين ؟
العمدة : في بلدنا يا غربي ياللي محدش عارفلك أصل من فصل وانا
كلتها كلمة ومش حتنها .

بلاك



اللوحة الرابعة

(يضاء على بيت الفولي ، أصوات هسهسة الليل ، نقيق الضفادع ..
الأم .. صابحة)

صابحة : (تؤدي رقصة زار على دقات المولد البعيد)

الأم : بس يا صابحة بس يا بنتي دوختيني

صابحة : (مستمرة دون توقف)

الأم : يا بنت بس وخشي نامي ، يا بت قلتلك بس الله لايسئلك (تصرخ فيها)

صابحة : يوره ، خير إيه يا أم حسن ، داني مبسوطه قوي يامه وفرحانة

الأم : واني مقبوضة قوي ومهمومة مش عارفة ليه .

صابحة : خير كفا الله الشر ، حسدوكي يا أم الولد .

الأم : خيلتيني بالولد ، ما انتي عندي بميت ولد .

صابحة : بكرة تجوز وأفوتك لوحذك .. وأشوفك من غيري تعملي إيه .

الأم : يا ريت ، يا ريت يا بيتي ، ميتي أشوفك عروسة يا صابحة ، دي

غاية المني (تسمع صوت غراب) اللهم اجعله خير ، يا تسوى

أبوكي اتخر كدى ليه .

صابحة : أهو اتلقيه في النصة سهران مع اخوانه .

الأم : فليبي واكلمي ومقبوض قوي يا صالحة .

صابحة : نامي ، نامي يأمًا واطمني انشاء الله كل خير ، نامي ومتخافيش

الأم : ومين يجيله نوم يا بنيتي ؟

صابحة : (تقف وتعاود الرقص والدندنة على أغنية)

وبيت مين العالي أبو شباك قوى ، والعتبة القرنفل والحيطان

قوى

الأم : يا بت قلتلك روحي نامي قلبتي راسي .

صابحة : جرى إيه يامًا انتي عايزة أبوي يهمل أكل عيشه ويجي يقعد جنبك .

الأم : يابت مش عوايده يتخرزي الليلة كفايه خشي نامي .

صابحة : طب هاتي أخويا لما أبوسه .

الأم : (تفزع منها) لا .. ابعدي عنه .

صابحة : ليه ياما هو أنا حاكله .. داني اخته ياما جراك إيه

الأم : (تنتبه للغلطة) ما تزعليش يابتي راسي مقلوبه قوي ، قلبي مخطوف الليلة دي .

صابحة : خلاص ياما أني مش زعلانه ، تصبحي على خير (تدخل للنوم)

(تدخل صابحة إلى الداخل وتظل الأم مهمومة . ويزداد خوفها وتوجسها مع صراخ الطفل)

الأم : هوو هوووه يا ننه هوو ، هوووه يا ضنايا هوووه ، نام نام ، وادبح لك جوزين حمام ، نام نام وادبحلك جوزين جمال (تلمسه بيدها) يووه يضنايا يا ولدي جسمك سخن املهلب ياترى فينك يا فولي ، اعمل إيه يا ري ، يا ضنايا يابني النسي حارسك وضمينك .

(تحلم وهي في لحظة اغفاءة تصل الغفوة لنوم سريع وكأن كابوس وأشباح تحاول أن تأخذ وتختطف الطفل من يدها)

شبح ١ : قال يا عانيه يا عانيه ، قال يا خاينة يا ردية

شبح ٢ : قال يا لاعنة يا ملعونة رايحة فين

شبح ٣ : رايحة تجيب الواد من باط أمه

شبح ٤ : باط باط البطال .

شبح ٥ : لو انزلتي بحر الغطاس لضرب عليك بالرصاص .

شبح ١ : وانزلك بحر الغواص لاتبان لك جته ولا راس .

الأم : ولد .. ولدي .

شبح ١ : ألف بعد الشر .

شبح ٢ : عين وحلت فيه المسكين .

شبح ٣ : عين ملعونة لاعنه ملعونة

شبح ٤ : عين فاجرة ردية ، تفلق الحجر .

نقيب : يتحمل إيه المسكين .

الأم : ولدي ولدي .

شبح ١ : مسكين يا ولداه .. قلبه حينفطر من العياط .

الأم : الواد حاجة بتسحب روحه سخن ملهلب نار .

شبح ٢ : غطاس بحر الغواص اضرب عليها بالرصاص .

الأم : هي مين ؟

شبح ٣ : أم الاصبيا عايزة تشده معاها

الأم : والعمل إيه ؟.

- شبح ٤ : خلي الداية ترقيه ولا ترده .
- شبح ٥ : آمال أحنا بنعمل إيه ، حوش عنه حوش ، حوش عنه كل ردي كل بطل .
- شبح ١ : واكفيه شر البطل . عين البطل . يد البطل واحميه من الحسود المنكود .
- شبح ٢ : العين اللي تحق تطق ، يبلاها بعماما .
- شبح ٣ : هاتيه نعمله عروسة ونجزم كل اعنيها ونحرقوها ف وشه .
- الأم : حرام يتفرع .
- شبح ٤ : يا عين يا عنيه يا حاسدة يا حسوديه .
- شبح ٥ : العين اللي تحسد تفسد العين البصاصة يندب فيها رصاصة
- شبح ١ : ابعدي عن الوليد انشاالله تجيلك رزيه .
- شبح ٢ : لفيه ع الزير ونطحيه سبعة ببيان ، ودقيه بالإبر الحامية في مفرق راسه .
- الأم : داك صغير ميه ، ما يتحملش .
- شبح ٣ : اسمعي كلام الأسياذ وبلاش عناد وهاتيه نرقيه .
- الأشباح : يا ولد يا ولد حس طبلك ف البلد .
- شبح ٤ : مفارق مفارق ، يفضل ف باطك ولا يفارق .
- شبح ٥ : وحجابه من جلد الخوت والرضعة من لبن التوت .
- الأم : ولدي ولدي

الأشباح : يا ولد يا ولد حس طبلك ف البلد .
شبح ١ : رضعيه ثلاث رضعات ، في كل ثلاث أدنات .
شبح ٢ : نزليه في بير غويط ثلاث مرات وارفعيه .
شبح ٣ : ونطحيه سبع حيطان ، سبع ببيان .
شبح ٤ : ولقي بيه سبع عتبات وليمه البسلة سبع غلات سبع ضمات .
شبح ٥ : وهاتيه تربطهولك ف اديه وف رجليه بزعا ف النخل العالي .
الأم : قلبي ما يتحملش ولدي .
الأشباح : يا ولد يا ولد حس طبلك ف البلد (ياخذون الطفل المتخيل للأم) .
الأم : (تدور بينهم) ولدي ولدي ولدي .
الأشباح : يا ولد يا ولد حس طبلك ف البلد .
الأم : ولدي ولدي ولدي .. يا حسن يا حسن يا حسن (يهربون)
تعود لتصحو من غفوتها وكابوسها وتفيق ، فتكشف ذلك
وتصرخ (يا فولي ، يا فولي ، انت فين يا فول ي، يا فولي يا
فولي .



اللوحة الخامسة

(يضاء المسرح أمام دوار العمدة حيث يوثق الفولي في شجرة

ويتم استجابة ومساومته وتهديده بمساعدة شيخ البلد والغفر

بحضور العمدة والشيخ عبد اللطيف)

العمدة : الفولي عيضر نار ف البلد ، عجائب .

غفير ١ : هو هيعترف بعظمة لسانه يا كبير .

الفولي : مش بتاعتي والله ما بتعتي يا عمدة

العمدة : هيه إيه اللي مش بتاعتك يا ابن دهب ؟

غفير ٢ : فرده بلدي ، روسي يا حضرة العمدة .

العمدة : اكمنها صوقها عفش عتكب كب ، رجت حطان الدوار .

شيخ البلد : الدوار وبس ، دي رجت البلد كلاهما .

عبد اللطيف : ماتقول يا واد يا فولي ع اللي عطهالك وتبرأ ذمتك.
العمدة : انت مش شاهد على كده يا مولانا ، شاهد وأنا حنكر
الشهادة ليه أروح فين من يوم الحشر .
شيخ البلد : عفارم عفارم ، وشاهد كمان ع التشخيص مش كده
برضه ؟
العمدة : دي مصيبه تانيه ، خليها على جنب ، انت ياواد بتشخص مع
العيال ف انصاص الليالي .
شيخ البلد : لأ وبيشخصوا إيه اللي فات من سنين طويله واندفن .
العمدة : يعني ما لقتوش إلا حكاية المركب اللي غرقت طيب شوفوا
حكاية غيرها .
شيخ البلد : انتوا ياواد مش عارفين المركب دي بتاعت مين ؟
العمدة : دول عايزين يفضحوني ويخربوا بيتي ، أقول إيه للبيه الكبير
لو سمع .
عبد اللطيف : مهو أكيد سمع هو فيه دبة غلة تستحي ف البلد إذا كلك
سمع ضرب النار أكيد سمع .
القلي : مانت كنت قاعد وابتفرج عليها ، عجائب .
عبد اللطيف : أيوه كنت قاعد ، لكن أي مالي ، قاعد ف حالي وكافي
خيري شري .

شيخ البلد : مولانا يقعد مطرح ماهوه عايز ، تحل البركه ، يعني انت

شاهد على دي يا مولانا .

عبد اللطيف : أيوه شاهد

العمدة : يعني بقوا جنايتين .

شيخ البلد : احنا كلنا غلبان وبسترزق ف بلدنا ، وقلنا وماله زي

بعضه .

العمدة : وكمان فالقنا بحسك اللي يطلع العقارب من شقوقها

ورضيين .

شيخ البلد : انما توصل انك تضرب نار وبسلاح مش مرخص وعياني

عينك كده ده فجر .

الفولي : مش بتاعتي ، والله ما بتعتي يا شيخ البلد ، صدقوني يا ناس

العمدة : تاني ، مش بتاعتك ؟ طيب طيب ابقى قول الكلام ده

للحكومة .

شيخ البلد : انت فاكرها سايبه ولا فوضه .

العمدة : دا سين وجيم ، يعني فيها سجن ، هي البلد ناقصة .

شيخ البلد : ويمكن يكون فيهما شئ ولا اعتقال مدى الحياة .

الفولي : يا خراب بيتك يا فولي ، أنا ما أقصد يا خلق أنا قلت أفرح

للولد من نفسي ، قلت أفرح زي الخلق ما بتفرح ، سأمحوي

ما كنتش أعرف ، أني محقوق يا أكبار ، أني غلطان يا أجويد ،
واستاهل ضرب الصرمة القديمة كمان .

العمدة : يبقى تقر ع اللي أعطاك السلاح (يشير للغفر بالضرب)
شيخ البلد : مش حيقر ، يبقى الكرباج يهري بدنه لحد ما يبان له
صحاب (يستمر الضرب)

الفولي : أني محقوق ليكم ، آخر مرة تحصل ، سامحوني النوبة دي أحب
على اديكم . سامحوني يا جناب العمدة .

العمدة : أنا .. إن كان علي ممكن أسامحك لكن البيه اللي خارب الدنيا
دي فيها رقد ، عايزني أترفد من العمديه علشان خاطرك
ياهلفوت انت ؟

الفولي : ما عاش ولا كان اللي يرفدك يا عمدة .
العمدة : يعني ، نهايته مش هتقر بالتي هي أحسن يا فولي ؟
شيخ البلد : ابعت يا عمده هات حريمه من البيت والواد كمان ، خلينك
نخلص .

الفولي : لأ ، بلاش ، حرام ، يا ناس ، دهه ذنبهم إيه بس ، اقتلوني
اشنقوني .

العمدة : (مقاطعاً) يبقى تقر وتعرف وتمضي الأوراق اللازمة يا صليح
يا غربي .

شيخ البلد : خلاص يا كبير البلد انت قلبك كبير ، سامحه النوبا دي .

العمدة : لا يمكن ، لو طلع أبوي من الجبانة لا يمكن أسامحه ، دي عيال
عيارها فاللات ، وأنا بكده مش ح أقدر ألم البلد دي، ولا
عايزني أسيب كل من هب ودب يمشي على حل شعره .

عبد اللطيف : شيخ البلد ما يقصدش يا عمده ، (ينفرد بالقولي) يا واد
يا فولي أنا اللي بكلمك ، امضي يا واد ع اللي يقلك عليه
العمدة ، خليك تخلص م الورطه السوده دي، اسمع الكلام
أحسلك انت مش كد التيار يا واد يا فولي ، دا التيار جامد
قوي . خلاص ، خلاص يا عمدة ، القولي حيمضي ، خلاص
يا فولي قلت إيه .

العمدة : هنقعد نتحايل كتير على ابن الكلب ده ؟ انت يا واد يا
غفیر .

غفیر ١ : نعمين يا حضرة العمدة .

عبد اللطيف : خلاص يا عمدة القولي حيمضي ع اللي انت عايزه .

القولي : أمضي على إيه يا ناس هو أنا حيلتي حاجة .

العمدة : شايف بيقول إيه ، ما أنا قلت لك دا أصناف تخاف ما
تختشيش أشكال واطيه ما تحسنش الجميل ، خير تعمل شر
تلقى ، التليفون يا واد يا غفیر لما أطلب النياية وهي تعرف
شغلها مع البجم ده ، أنا هوجع ف راسي ليه ؟ هات يا وله
(صارخاً) .

شيخ البلد : (مهدتاً) استنى بس يا عمدته ، يا واد يا فولي اسمع الكلام
اللي حقولهولك كويس ، وده عشان مصلحتك ، يدواد دي
ورقه ضمانه احتياطي يعني عشان لربما شكوى كده ولا كده
عشان ضرب النار ، العمده عايز مصلحتك وبيامن نفسه ده
حقه ، افهمت ولا لسه ، افهمت ، عال طيب وايه رأيك بقى
أنا حأمضي قبل منك عشان متخفش محأشهد معاك ، هات
الورقه يا عمدته ، وآدي إمضتي إحنا كلنا عاملين على
مصلحتك يا عبيط ، اطمنت ، وانت كمان خد امضي يا
شيخ عبد اللطيف زياده في الضمانة عشان خاطر القولي .
عبد اللطيف : (متردداً) أيوه أيوه آمال هات أمضي ما أمضيش ليه
(يقرأ)

العمدة : انت لسه حتقرا يا مولانا ، ما تمضي وتخلصنا .
عبد اللطيف وأنا من ميتة بقرا وراكم يا عمدته ، وآدي إمضتي جاهزه
وفرمة أي والله فرمه ، آمال العلام بقى (يضحك)
شيخ البلد : (يبادلله الضحك) لأ الإسم الثلاثي يا سيدنا (يأخذه
جانباً) دا ورق رسمي مش م الثاني (يضحك) .
عبد اللطيف : (يبادلله الضحك) وثلاثي يا سيدي عشان خاطرك ،
عبد اللطيف علي أبو

شيخ البلد : (يخطفها) هات ، خد يا واد يا فولي ، أدي القلم والورقه ، امضي .

الفولي : بس أنا ما بعرفش أمضي .

شيخ البلد : الختامة يا غفير .

غفير ٢ : جاهزة يا شيخ البلد .

شيخ البلد : هات ، لأ صباعك اليمين (ييصمه) عال .. أهو كده ساهله مش كده ، دي مش بصمه اللي مغلبنا عليها .

غفير ١ : (مسرعاً) الباشا ع التليفون يا عمده .

العمده : (مشيراً بالخروج) ألو ، سعادة الباشا ، حمدله ع السلامة من

تترانيا ، كويسين بخير ، بيبوسوا اديك ، نعمين ، أصل زرع

وحياتك المولد بدأ والليله الكبيره بكرة ، نعمين أرض الجبل ،

باسم الله ما شاء الله بقوا جنه واحياتك أيوه سامع انت جلي

في السكة ، بتكلم من تليفون العربيه ، انت والهانم يا دي الهنا

يادي الهنا تشرفوا وتأنسوا يا سعادة البيه ، الفله أيوه فدان

أمال إيه ، مش ناقص إلا القراطين بتوع الفولي ، أيوه نديله

إللي عايزه ، تمن اللي عايزه ؟ أهو قاعد وسامع كل حاجه ،

نعم ، سامع ، نشغله ، أيوه ، بس حنشغلو إيه ، نعم ، شيخ

غفر حته وحده ماشي أوامرك يا باشا ، نشغله شخ غفر ،

عايز سلامتك ، لما تيجي بالسلامة أبقى أقولك ، خلص

موضوعي وموضوعي وموضوع شيخ البلد ووافقولنا على
أرض الجيل الله ربح سعادتك ربنا يبارك فيك ويزيدك من
نعيم الله ، في انتظار سعادتك ماشي مع السلامة ، مليون
سلامه ، (يضع السماعة) .

العمدة : (يتجه للفولي) يا واد ياغفير

الغفر : نعمين يا حضرت العمدة .

العمدة : الفولي بقى شيخ غفر عليكم ، ابسط يا فولي باضت لك في
القفص البيه جاي معاك بالباع والدراع ، بس على الله تبيض
وشنا معاه وتسترننا ، اسمعت بمقول إيه ف التليفون،
وحيوصل بعد كام ساعة اسمعني كويس ، عايز توريني همتك
يا عم انت والغفر عايزك تبلغ الناحية كلها إني البيه جاي
بكره ، اديله يا واد بندقية ، ما يصحش يبقى شيخ غفر من
غير بندقية ، يالا يا فولي خد الغفر وعاييز كلامي يتنفذ
بالحرف الواحد ، عايز البلد كلها بكرة ف استقبال البيه دي
الليلة الكبيرة يا فولي .

(يتصرف العمده والغفر ويظل الفولي .. في حالة اعياء مذهولا

ومندهشاً مما يحدث حوله بهذه السرعة .. ويظل يدندن)

الفولي : القط ، القط ، القط داخل البنية .. نقى الفروجة العتقية .

القط ، القط دخل الخزانة ، نقى الفروجة العريانة .

بعت القراطين يا فولي .. بكرة تبيع الحاف
وحتشحت ع البيان .. يدوك اللقمه حاف
لا والنبي يا فولي .. جاتك خيبه يا فولي .
الصبيه : (يكونوا قد دخلوا وسمعوا ما يقول ، يتحلقون حوله
ويغننون بما يشبه التجربة الشعبية)
لا والنبي يا فولي جاتك خيبه يا فولي
فولك سوس يا فولي بيع واتجوز يا فولي
قمحك عطن يا فولي قطنك دود يا فولي
بعت القراطين يا فولي جاتك خيبه يا فولي
ضحكوا عليك يا فولي حلقوا شنبك يا فولي
بعت القراطين يا فولي .. بكرة تبيع الحاف
وحتشحت ع البيان .. يدوك اللقمه حاف



اللوحة السادسة

(لقاء بين صابحة وسالم تحت شجرة قرب منزل الفولي)

صابحة : (تروح وتجيء يبدوا عليها الضيق)

سالم : (يظهر) صابحة إيه اللي جرى

صابحة : يعني ما عرفتش باللي حصل ، أخوك شيخ البلد والعمدة

طبخوها سوى ، لعبوا ملعوهم وبيعوا أبوي القراطين اللي

حيلته علشان يرضوا اليه والهائم .

سالم : عارف وحاسس ، هم أبوك مش همك لوحذك ، بس انت

اهدي وكل عقده وليها حل .

صابحة : حل إيه يا سالم ، موت يا حمار على بال ما يحيلك العليق ،
شفت عمرك أبويا القولي ينفع شيخ غفر .

سالم : ملعوب كبير لعبوه وبعدين يخلعوه ، لكن ماتخفيش يا صابحة
حقكم حايرجع .

صابحة : يرجع بعد إيه بعد ما أبوي باع ومضى ويا ريته قبض التمن .

سالم : مضوه على ورق تزوير وغش ، مكش يعرف إنه على بيع
الأرض .

صابحة : ولما عرف يا ولداه وهو حيتجنن ماشي زي المدبوح وسرقاه
السكينة مش داري بحاجة، لكن تاره مش حسيه .

سالم : الحكاية دي سيبهالي أنا كفيل بيها .

صابحة : وانت مالك ، ذنك إيه ، ما كفايه اللي بيك مكفيك .

سالم : ما تقوليش كده يا صابحة ، أنا إيه وانتي إيه ولا غيري رأيك .

صابحة : والله ما أنا عارفه بقول إيه ، غصب عني يا سالم أبويا وأممي

حيموتم من كتر القهر ، القولي بقى شخشيخة ييلعبوا بيها

الصغار وسليوه يسلوا بيها الكبار حسبنا الله ونعمه الوكيل ،

حسبنا الله ونعمه الوكيل .

سالم : (يضرب كفاً على كف) يبقى علي وعلى أعدائي والبادي
أظلم .

(تنتقل الإضاءة على الفولي وهو ينادي على ندوة البية نائب

الدايرة وسالم يترل للصالة وهو يرقب الفولي)

الفولي : يا أهالي البلد الكرام .. الحاضر يعلم الغايب والكبير يقول

للصغير إن البية نائب الدايرة وصل بالسلامه جاي يقعد

معاكم ف الساحة ويتأنس ببيكم أصله متوحشكم قوي كبير

وصغير ، هو ف الحقيقة جاي يسمع المرادي كل شكوايكم

وطلباتك ، بس الأكيد الأكيد أنه جاي يتشكر ليكم قوي

على وقفتكم معاه ف الإنتخابات الأخيرة اللي نجحتوه فيها

بالعافية وبيقولكم ليكن معلوم لديكم ان القصر بتاعه مفتوح

ليل ونهار والليله الليله الكبير القصر مفتوح للي يا كل واللي

يشرب والحاضر يعلن الغايب والعمده كبير البلد بيقولكم

ممنوع حد يتخلف عن المعاد وهو حيقيد أسامي الحاضرين

واحد واحد واللي مايحيش يا ويل أهله وذنبه على جنبه

والأيام بينا .. يا أهالي البلد الكرام .

شاب ١ : أهو دلوقتي حيقتر الوز والبط والمالطي هيص يا عم عليه

هيص .

عليوة : البركة ف الخاسيب يا ابني .

شاب ٢ : هو عمي الفولي بقى راخر من الخاسيب .

شاب ٣ : أيوه بقى ديل م الديول .

- عليوه : الفولي يا خوانا غصين عنه اتضحك عليه .
- شاب ٤ : أيوه هو الفولي كده دول قدرتم جهنم ، دول يضحكوا ع الملايكة .
- شاب ٥ : دول بيعرفوا يلعبوها صح ، طووه تحت جناحهم وفرحوه بمشيخة الغفر .
- عليوة : أيوه دول يسرقوا الكحل م العين .
- شاب ٢ : يستاهل اللي يجراهه حد يسلم دقنه كده ليهم بالساهل غيرش الفولي مغفل وعبيط .
- عليوة : ما كل واحد يللم لسانه بقى ، اللي معاه كلمة زيننه يقولهها واللي ماوش يسكت ولا خلاص البقرة لما توقع سكاكسناها تكثر .
- شاب ٥ : في كل مولد عروسة واثنين من بلدنا بيتجوزوا يا ترى السنادي الدور على مين .
- شاب ١ : أيوه صحيح يا عم عليوه السناس مسن اللي حتبقى عروسة المولد . عايزين ناكل يا خلق .
- عليوه : الظاهر السنادي لا فيه عرايس ولا يجزنون ، انت مش شايف اللي حاصل .
- شاب ٥ : يا جدع انت مش عايش ف الدنيا ولا إيه همك على بطنك وبس . (يظهر الهاتف من على السلويت الفولي والغفر وراءه

ثم يظهر العمدة وشيخ البلد والشيخ عبد اللطيف في استقبال
اليه أعلى مستوى في المسرح) .

الفولي : (يمر على السلويت) أمجد بيه ، أمجد بيه .

الغفر : (وراءه) أمجد بيه ، أمجد بيه .

الفولي : يا محني ديل العصفور .

الغفر : يا محني ديل العصفور .

الفولي : أمجد بيه هو المنصور .

الغفر : أمجد بيه هو المنصور .

الفولي : ما تقوليش ماتعدليش

الغفر : ما تقوليش ماتعدليش .

الفولي : أمجد بيه غيره ما فيش .

الغفر : أمجد بيه غيره ما فيش . (المسرح يمتلئ بالمجاميع والنساء —

الأم — صابحة) .

شاب ٢ : يقولوا اليه جاي وحيعمل مشاريع كثير في الأرض الجديده

عليه : انتوا بتصدقوا الكلام ده ، دا ضحك ع الدقون .

شاب ٥ : دول يقولوا حبيبي فله عليها على أحدث موضه ، جاي

رسوماتها معاه من بلاد بره .

شاب ٣ : بره جوه خلونا في حالنا الحيطان ليها ودان .

- عليوه : الجزييل أبوا لبن حليب وصل طري على قلبك يا عطشان .
- شاب ٤ : والله راجل ومن ضره راجل يا عم عليوه .
- شاب ٥ : طبعاً هي دي المرحلة لولاه كانت نصبة الفولي اتقفلت .
- شاب ١ : هو اليه اتأخر كده ليه .. هو جاي ماشي ولا إيه .
- شاب ٢ : إيوه ماشي .. أصلي بيسلم على كل بيت بيت بيت وقفـر قفر .
- شاب ٥ : غريبه أبويا صاغلح لسه ماجاش .
- عليوه : ولا سالم أفندي لسه الثاني ما وصلش .
- شاب ٣ : هو كده يغطس بغطسته ماحدش يعرف بيروح فين .
- شاب ٥ : بيقولوا العمليه شاده قوي بينه وبين العمدة .
- شاب ١ : لأ وانت الصادق دا بينه وبين أخوه شيخ البلد .
- شاب ٣ : عايزين يجوزوه بت العمده غصب عنه .
- فلاح ١ : ويا ترى سالم عينه على مين .
- عليوه : وانت مالك يا حشري ماتسيبوا الناس ف حالها .
- شاب ٥ : وهي دي حاجه بتداره يا عم عليوه ذا البلد كلها عارفه انه رايد بت الفولي .
- شاب ٢ : صابحة يا زين ما اختار والله يبقى ولد يفهم .
- شاب ١ : ست البنات والله .
- عليوه : يا خونا مش وقته دلوقتي خلونا هنا . خلونا هنا .

الفولي : (يظهر هاتفاً) البيه وصل البيه وصل يا حضرة العمدة (سلام
بالمزمار البلدي ، يصطف الغفر ويدخل البيه) .

ددي واه .. ددي واه

ورمز الكرسي احنا اخترناه

الغفر : ددي واه .. ددي واه

ورمز الكرسي احنا اخترناه

البيه : إخواني أحبائي أبناء الدائرة الأعزاء الكرام . أحييكم بتحية
الإسلام السلام عليكم ورحمة الله وبركاته ، أما بعد

الفولي : الراجل الجد يبحب الجد .

البيه : أما بعد .. أديني فرصه يا مرشال الغفر يا .. يا فولي .

الفولي : شوت الكورة حط الجون ، والفولي والله مفتون

شاب ٢ : الراجل الدون الراجل الدون ، والفولي والله مجنون (ضحك

من الجميع) .

البيه : يا خوانا اسمعوني مهو لازم تسمعوني عشان تفهموني ولما

تفهموني لازم تحبوني .

الفولي : يا سلام ياسلام على أحلاى كلام

الغفر : يا سلام ياسلام على أحلاى كلام

اليه : إخواني أنا نجيحت والحمد لله بتسعين ف اليه صحيح ف الإعادة
ولكن نجيحت والبركه ف أصواتكم الحرة الشريفة لقد قلتهم
نعم لي ولكني أقول لكم لأ .

فلاح ١ : ليه كده دي آخرة الجميل ، زي القطط بتنجح وتنكر .

اليه : يعني محدش سألني ليه أقولكم لأ .

فلاح ٢ : قول يا خويا قول .

اليه : أقول لأ للتخلف. لأ للرجعية. لأ للإرهاب لأ لعصر التقشف

والعشش العشوائية والقمامة إلا ما نعيش في قمامه .

الفولي : (يرقص بالبندقية) إلا ما إلا ما إلا ما منعيش في قمامه

الغفر : إلا ما إلا ما نعيش في قمامه

اليه : اخواني انتوا عارفين كويس احنا في عصر السرعة والتسرع

السريع المتسرع عصر الكريم شلنتيه والشيكلواه والسامبا

والرمبا والكانتلب والجريفروت والتسكافيه والـ الـ

الجرسي ..

الفولي : جرسى جرسى ونجحننا رمز الكرسي

الغفر : جرسى جرسى ونجحننا رمز الكرسي

اليه : أما بمناسبة الكرسي وبمناسبة نجاحي فأنا حاوزع على كل واحد

كرسى مش ف دماغه لأ علشان يقعد بيه ف الشمس ع

الزراعية وبدال ما يدي وشه للترعة يدي ضهره .

القول : كرسى كرسى لبهانه والواد مرسى

الغفر : كرسى كرسى لبهانه والواد مرسى

البية : يا اخواني احنا لازم ف المرحلة الجاية نحارب السمان والنخان

امات كروش واسعة ، أنا عاقولها علني وميهمنيش حد ورزقي

على الله ، اخواني فليكن شعارنا في المرحلة اللي جايه (

خلي الناس تاكل ، خلي الناس تعيش) واحنا بنشتغل على

تلات محاور أنا أعلنتها ف المجلس خلي الناس تلبس الرجالة

والحرير ، تشتري وجتر واسترتش خلي الناس تاكل هامبرجر

ماكرونة بالبشمل تاكل بتزه

فلاح ١ : البيتزه دي إيه كوتش ولا إيه .

فلاح ٢ : دي كاكولا يا جاهل بس من الطويلة

البية : الخور التالت خلي الناس تحلي جاتوه،بتيفور، كريم شانتية. أنا

قلت لازم كل الناس تاكل محدش سألني تاكل بإيه .

الجالسون : بالمعاليق .

البية : لأ ..

الجالسون : ياديهم .

البية : لأ ..

الجالسون : بالفلوس .

فلاح ١ : أنا اللي قلتها ، أكسب ألف جنيه ، ماهو يا سعادة البيه
الواحد بالقرش يعرف ياكل كل اللي قلت عليه ، يقدر يا
كل كل يوم لحم بروتين .

اليه : لأ مش بالفلوس ، ها غلب هماركم .

الجالسون : غلب همارنا يا بيه .

اليه : أنا كلت لازم كل الناس تاكل يبقى لازم تاكل لكن تاكل
بياه تاكل بالشوكه والسكينه ، اديكم لسه مجربين كتطبيق
عملي مش مجرد شعارات .

فلاح ٣ : يقطع الشوكه وسنينها هو احنا عرفنا ناكل .

فلاح ١ : دول قاصدينها معانا علشان ما نكلش .

فلاح ٢ : ده أكل ده ولا تزيب دانا كل ماضرب الشوكه ف الصحن
المكرونايه تنط لفوق وتتر ف قفايا .

اليه : أنا أحب أظمن بنفسي على وصول الدعم لمستحقه ، كلتم
كويس .

الجالسون : كلنا يا بيه .

اليه : شيعتم وحليتم .

الجالسون : شيعنا وحلينا .

البيه : آه مهو الجلد جد انتوا فاكرين بيت الشعب اللي كان ف
دعايتي الانتخاييه حد فاكركه اللي فاكركه أنا حديه اتنين جنييه
دهب وشوال قمر دين .

الشيخ عبد اللطيف : أنا يا بيه والله فاكركه يا باشا دا محفور جوه قلبي
أي والله العظيم جو قلوبنا كلنا هو كان مكتوب كده
بالظبط(نداء بالشعر لسعادتك لناخي وأبناء الدائرة)
اخواني / إذا اتخبتكم ففي نجاحي تكون عزة فأنتم يا رفاقي أهلي
وكم أبادلكم المعزة .

من فرط حيي لكم فإن الله والله لك فرد دبحت وزه .

الفولي : ددى ددى رمز الكرسي الروح تفديه .

الغفر : ددى ددى رمز الكرسي الروح تفديه .

الفولي : ددي وا ددي وا رمز الكرسي احنا فده .

الغفر : ددي وا ددي وا رمز الكرسي احنا فده .

عليوه : (متدخل) ان كنتوا نسيتموا اللي جرى هاتوا الجرايد تنقري
واحنا اللي يقلنا ف طلباتنا يا مولانا إلى كل المرشحين عن
الدايره .

نريد مرشحاً حراً أميناً رحيماً بالجياع البائسينا

يحارب فقرنا ويكون منا يغزينا يداوي العاجزيننا

ويحمي كل مظلوم أتاه يدافع عن حقوق الضائعينا

ولا يخشى قوياً ذا نفوذ ويخشى الله رب العالمينا
نريد مرشحاً حراً أميناً يخاف الله ويتقيه فينا

الجالسون : (يصفقون بشده) .

اليه : الحمد لله ، الحمد لله ، الحمد لله ، احنا حناخد من الدنيا إيه
غير اللقمه والهدمه إن كان على العمارات وبينهاها والأرض
واستصلحناها والعمده أكثر واحد يشهد بكده وهو عارف
الأرقام كويس .

العمده : امسك الخشب يا بيه ربنا يزيد ويبارك (يصفق) .

الجالسون : (يصفقون)

اليه : لأ والله صدقوني أنا خلاص مش عايز حاجه من الدنيا أنا
قدمت إقرار ذمه ماليه بكل الثروة اللي معايا وأعلنتها أنا مش
محتاج مرتب أنا مش محتاج لحاجه أنا مش محتاج .

فلاح ١ : ولا للأصواتنا يا بيه .

اليه : ولا لأصواتكم إيه انت حتزلي ولا لصواتكم ادوها لحد غيري
يكون محتاجها احنا كفايه علينا ثلاثين سنه كفاح ونضال تحت
قبة البرلمان .

فلاح ٢ : أيوه والله يا بيه مهو الثاني البرلمان كل سنه بيرموه ويجددوه .

فلاح ٣ : آمال إيه يا وله الحيطان صدعت من كتر الزعيق والصريخ

والصوات والكفاح والنضال اللي بيقول عليه البيه ، هو إيه

دلو جبل كان اتهد كتر خيره إيو الله كتر خيره (تصفيق) .

سالم : (يظهر في الصالة) بتسقفوا على إيه يا ناس اصحوا بقى فوقوا

بقى دا ضحك ع الدقون كفاح قال ونضال ما تصدقوش ولا

كلمة كل مرة المقلب هو هو وانتوا بتشربوه وعلى قلبكم

زي العسل ، انتو إيه ما يتحسوش، ميتين والله العظيم الميتين

أحسن منكم .

فلاح ٣ : إيه ده انت بتشتبنا يا أخينا ما اتلم لسانك (تنشب مشاده

يهرب العمده والبيه وشيخ البلد على اثرها)

الغفر ١ : القولي هرب بالبندقية يا عمده القولي هرب القولي هرب.



الموهبة السليمة

(تنتقل الإضاءة على السلويت حيث تمر شخوص تبحث عن الفولي)
صوت صابحة : (يا با فولي يا با فولي يا با فولي)
صوت الأم : (يا فولي يا فولي يا فولي)
(ومن اتجاه آخر يظهر عليه ومجموعة الشباب)
عليه : يا فولي يا فولي يا فولي
الشباب : يا عم الفولي يا عم الفولي يا عم الفولي
(يظهر العمدة والغفر في أعلى مستوى في المسرح يشير لهم في اتجاهات
مختلفة)

الغفر : (يبحثون في كل اتجاه مختلف عن الآخر حتى جانبي المسرح
والصالة)

(يضاء على ساقية توشي بمكان الغيط حيث صالح وبعض الفلاحين)

الفلاحين : (يقومون بالبذر)

وقصدنا الباب العالي باب المولى الكريم

يا وابور الساعة اتناشر يا ابو عجل حديد

شمس العصاري غابت ياللي بلادك بعيدة

صاحبه : (تدخل) يا با فولي يا با فولي يا با فولي

(تجلس عند الساقية) ما هان عليك يا بوي قملنا ،

هاتلك بابور يا حنون ونزلنا ..

والله الزمان يا بوي بعدك يهونا

ما هان عليك يا بوي تخلينا

هاتلك بابور يا حنون ودلنا

والله الزمان يا بوي بعدك يورينا

الأم : (تدخل) يا فولي يا فولي يا فولي

سالم : (يدخل) صاحبة .. صاحبة انتي فين .

صاحبة : سالم شفت يا سالم الفولي هج على راسه وساب البلد .

سالم : وبعدين يا صاحبة ما تعمليش كده زي الصغار اصيري امال

صاحبة : ماعدلناش ضهر يحميننا ولا يحادي علينا .

سالم : ماتقوليش كده امال ، واحنا رحنا فين ، ان غاب الفولي احنا
كلنا الفولي ، رقبنا سداده ، بس الفولي راجع أنا واثق إنه
راجع وبكره تشوفي عن إذلك (يخرج مسرعاً)

صالح : (يقترب من صابحة) شدي حيلك امال يا صابحة ، علشان
خاطر امك وأخوكي ما تخافيش أبوك راجع .

صابحة : ما خلاص يا با صالح الغلب بقي مكتوب علينا والخوف نصينا

صالح : قدر ومكتوب يا بتي والمكتوب ما منوش مفر وتار أبوك مش ع
العمده بس تار أبوك فيه صوابع شيخ البلد والبيه الكبير ، فخ
نصبوه للغلابه الطيبين .

صابحة : والعمل يا با صالح .

صالح : لينا رب اسمه الكريم حال أبوكي زي حال ناس كثير قومي
روحي بقينا ف انصاص الليالي ، قومي يا م صابحه والصباح
رباح ، (يخرجون على اغنية وقصدنا الباب العالي باب المولى
الكريم) .

(تنتقل الإضاءة على منزل شيخ البلد ودخول سالم)

شيخ البلد : (يسمع وقع أقدام سالم) مين اللي جاي مين سيع الليل .

سالم : أنا سالم .

شيخ البلد : وجاي بدري كده ليه ما كنت تبيت هناك عندها داخل
تتسحب زي الحراميه ف انصاص الليالي كنت فين .

سالم : خبر إيه وإه لزوم الكلام ده مانت عارف أنا كنت فين .

شيخ البلد : كنت ف النصبه ولا كنت وياها الفاجر أم عين قويه ، أيوه
أيوه مانت بتحب الغوازي طب يا أخي دحنا خاطبك بست
عمده أصل وحسب وقيمه مش أحسن برضه م المشي البطال
والعياذ بالله .

سالم : كلام إيه ده اللي بتقولي غزيره إيه وبطال إيه انت بتلسن على مين
؟

شيخ البلد : على صابحة بت الفولي يا ضي العيون .

سالم : هي حصلت لكده ، أما صحيح كبير وناقص .

شيخ البلد : أئي يا سالم ، بتهيني عشان وحده زي دي بت الفولي ؟

سالم : أوعى تحيب اسمها تاني على لسانك صابحة أشرف م الشرف
وأبوها أحسن من ناس كثير انت عارفهم .

شيخ البلد : الفولي ، المجنون ، ملقتش غير بت الفولي طيب ناسب
واحد عدل واحد عاقل .

سالم : الفولي مش مجنون بخطرته الفولي مجنون غصب عنه .

شيخ البلد : يعني إيه بقي .

سالم : يعني اسأل نفسك مين اللي جتنه ؟ مش أنتوا برضه .

شيخ البلد : احنا احنا مين يا واد ؟
سالم : قوام نسيت يا شيخ البلد ولا تحب أفكرك القراطين إنا أسفأناكم

شيخ البلد : بيع وشري محدش ضربه على إيده ؟
سالم : يا ريتكم ضربتوه مكنش باع لكن اتوا جددتوه اضحكوا عليه
عشمتوه بالحلق خرم اودانه عشمتوه بمشيخة الغفر لحد ما
بصم على البيع وبعدين خلعتوه تمثليه نصبتوها عليه انت وابن
عمك العمده علشان خاطر سعادة البيه وسواد عيون الهانم
مرته ، علشان الفلة الجديدة ، لازم تكون على فدان كامل
مكمل وفين في وسط البلد ، كنا فكرين عشان مدرسة ،
مجمع صحي مصنع ، لافلة البيه تضحكوا على الغلابة
وتغصبوهم يبيعوا أرضهم اللي ياكلوا منها عيش هم
وأولادهم .

شيخ البلد : (مقاطعاً) اسكت اسكت ، انت يا واد بتلسن ع العمدة
وكمان ع البيه والهانم صورة البلد وعنوانها العمدة اللي
عاملنا قيمة وشان وشنشان وسط البلد .

سالم : لمصلحتهم مش عشان سواد عيننا ، خلي الطابق مستور ،
اسكت ما تقلبش علي المواجه .

شيخ البلد : لأ قول ، فضفض ، ما أنا عارف قلبك اسود وجاحد .

سالم : أني برضه اللي قلبي إسود أني برضه اللي بهرب أرض أبويا
وبوالس مع العمده ولا أنا برضه اللي بأديه أرضنا يزرع
ويرمح فيها هو وأولاده .

شيخ البلد : علشان هيبتنا يا واد ياللي مش فاهم حاجه خالص، ولا عايز
هبتنا تضيع ف البلد، وتتمرغ ف الطين، انت لسه بدري
عليك، مش عايل هم حاجة، انت شقيان ف حاجة؟ انت
فاضحني ف البلد، ماشيلي ورا كلام شوية عيال وبتعارضنا
عيني عينك قدام الناس، أهى دقي لو فلحتوا .

سالم : حنفلح غصين عنكم، احنا ف زمن كل واحد ف رأيه وبعدين
الناس حرة تعمل اللي عايزاه، انتوا حد ولاكم علشان تحجروا
على أصواتنا سبوا الناس بقى تفك عن نفسها .

مسعود : ناس ناس مين يا عبيط ، هي دي ناس دي ناس تايهه مش
فاهمه راسها من رجليها، هبل مش عارفين مصلحتهم فين .

سالم : وانتوا بقى اللي عارفين مصلحتهم ؟

مسعود : طبعاً ، طول عمرنا خدمين الناس ، والكل يشهد بكده .

سالم : الكل مين يا شيخ البلد ، الحين طيب وبتكذب عليهم ، كمان
حنكذب ع الميتين (بصوت عال) انت نسيت زمان ولا
أفكرك .

مسعود : اسكت اسكت ، وجعت ادماعي ، فلقتني بكلام فاضي زي

قلته .

سالم : اسكت يعني إيه ، عايزني أسكت عن حقي أنا مش حسكت تلني
أبدأ .

مسعود:يا واد وطي صوتك ما تلمش علينا الناس في انصاص الليالي

سالم : حقي يا مسعود عايز حقي .

مسعود : حقتك حق إيه يا سالم .

سالم : نصيبي ورثي ف أبويا ، ومن دلوقيت كل واحد حر ف ناييه .

مسعود : وانت إيه اللي ناقصك مانت عايش واكل شارب،عمال

تاكل ف قتايه محلولة ، سيب الحمول لاصحاب الحمول .

سالم : حقي يا مسعود ، ومن دلوقيت كل واحد ينخ ويشيل حملة

لوحده .

مسعود : يعني عايز تعزل وتعيش لوحداك ؟

سالم : حقي شرع ربنا يا أخي أنا حر .

مسعود : حقتك موجود ، هو أنا حشت عنك حاجة يا ابن أبويا

سالم : ما تلفش ودور يا مسعود ، حقي عشرين فدان ، والبيوت

والمكن ، وكافة شي هنا ليه نصه ، ولا انت نسيت إني

شريكتك ف كل الورث .

مسعود : لأ أبداً أنا ما نستش حاجة ، وليك إيه تاني ، قول على كل
اللي ليك ما تسبش إبره ف خيط .
سالم : هو ده اللي قلته ، أنا مش عايز إلا اللي ليه .
مسعود : وعايز من مين ، مين اللي حيدھولك ؟
سالم : إن كان على مين اللي حيدھولي ، ما حدش حيديني حاجة من
جيهه ، حقي مسبوت ف كل حاجة والورق موجود .
مسعود : عفارم عليك جبت المفيد ، الورق ، الورق هو اللي يحكم
بيني وبينك إن كان معاك ورق يا شاطر يثبت اللي ليك طلعه
وورھولي .
سالم : يعني إيه ما الورق كله عندك شايله تحت باطك .
مسعود : الورق اللي عندي ده ملكي بتاعي ، دور يا خويا على ورقك
واللي ليك .
سالم : يعني أنا ماليش حاجة ، أبوك سابلك كل حاجة لوحدهك ، خلفك
انت وأنا مش ولده ، عايز تاكلني بذر وجدر يامسعود .
مسعود : بيني وبينك حد الله ، أنا يابن والدي كل شبر هنا مكتوب
على اسمي
سالم : مين اللي كتبك ؟
مسعود : أبويا وفيه شهود على كده كمان أهم حيين ما ملتوش روح
اسأھم .

سالم : ومين شهودك ؟
مسعود : العمدة والشيخ عبد اللطيف .
سالم : كداين .
مسعود : العمدة والشيخ عبد اللطيف كداين ! الراجل التقي بتباع
ربنا لآخر كداب .
سالم : الكلام ده عالي يا مسعود ، أنا عارف كويس أن أبوك
ما كتلكش خردة وحدة ، وبعدين ورقك وشهودك زور ،
وانت مشتريهم بفلوسك ارجع لعقلك يا مسعود وما تخليش
الطمع يعمي عنيك ، ما تخليش الكره ينسبك الحق حتى مع
أخوك ما تفتحش بيان للنار بينا يا مسعود .
مسعود : لأ خوفتني ، رعيتني يا واد طب أوسع ما فخيلك اركبه .
سالم : يعني ده آخر كلام عندك .
مسعود : ومعنديش غيره .
سالم : يبقى أنا حعرف آخد حقي إزاي . (يخرج مسرعاً)
(تنتقل الإضاءة على سالم يجري بالبطى ولقاء الشباب به على الأتراك)
المجموعة : ارمح يا واد فك القيود زيح السدود خطي الحدود واهرب .
سالم : أهرب لفين م المكتوب .
المجموعة : ععقد العزم وبدون فتاوي ومشوره من غريب ولا من
قريب .

سالم : دي جفوة الأهل في الحشا بتعل ، أروح لفين من نصيبي
الجموعة : ذل القعاد مر وصعيب ، والصبر ياما غرق مراكب تصبر
كثير تذلل أكثر في زمان مليون بطعم الغدر طعم الكره طعم
الحقد .

سالم : والطهر ليه ينداس والصدق في زمن الطمع ، والكره والحقد
اللعين ، البيع رخيص رخيص قوي ، كلنا بيع رخيص .
الجموعة كترت حواز يالسد ماب ين القلوب ، ضاع الحنين ، بيع اللي
باعوك واشتروا لحمك في سوق النحاسين .

سالم : سكين الأهل تالم الدم اللي ف اعروقتنا مبقاش دم الدم اللي في
اعروقتنا أصبح ميه بقي ميه مش دم بقي ميه مش دم ،
(على تشكيل تعبيري على غناء تعبيري)

المعنى : الحق دا مكتوب ضايح آه
والضهر قالوا توبه وفين نلقاه
تاه ف الطريق ما ليقيله بر
كاتم جراحه سر جوه الصدر
معذور يا ناس
الناس ما عدتشي هي الناس
والطهر اللي وصوا عليه بين العباد منداس
(تنتقل الإضاءة على منزل العمدة — شيخ البلد يدق دق عنيف)

العمدة : مين الداخول مين ؟ مين مين ؟ .. مين اللي جاي بس السعادي
هو أنا ناقص مين مسعود .

مسعود : الحقني يا عمدة ، إحقني (معه بندقية) إحقني مصيبة .

العمدة : جرى إيه يا مسعود وغوشتني .

مسعود : حقتلني ، سالم سالم عايز يقتلني بعد تعبي وربايتي .

العمدة : سالم ؟! يا راجل قول كلام غير ده .

مسعود : بقوللك كان كان حقتلني . لولا ربنا ألهمني وخطفت من
إيده البندقيه كان زمانه خلص عليا .

العمدة : هي حصلت لكده ، وصلت للقتل ، طيب اهدى اهدى بس
وارتاح .

مسعود : أرتاح هو عاد فيها راحة طيب المرادي جات على خير إيش
ضمني بكرة ممكن يعملها بصحيح .

العمدة : طيب اهدى ، دا أنا كنت فاكر الواد الفولي جالك بالبندقيه
مسعود : هو لسه مظهرشي لدلوقتي .

العمدة : لسة يا سيدي والبيه خارب الدنيا ع البندقيه ومهدديني
يوقفني عن العمدية وكله بسبب أخوك يا سيدي اللي مقويه
هو بته الخروسة .

مسعود : الواد اتجنن يا عمدة الواد عايز يطخني ببندقيته .

العمدة : دا أكيد اتجنن ولا اتخبل ف عقلة
 مسعود : بقي زي الكلب المسعور ومحدث عارف يلمه .
 العمدة : أيوه طايح فينا وامبهدلنا ف كل حته واتخلي سرتنا على كل
 لسان زي الطين .
 مسعود : عايز يكشف سترنا ويعرينا كدام البلد عايز يرمخ هبتنا في
 الوحل ، سالم مش حاجبيها البر يا عمدة دا عايز يقاسمني في
 شقايا وبقى عايز يقاسمني ف الأرض ،
 العمدة : طيب اهدى بس علشان نفكر لحل ف المصيبة دي مصيبة
 الفولي وسالم أخوك .
 مسعود : لسه حنفر يا عمدة أنا هاروح أبلغ المركز ، النيابة هي اللي
 تحميني .
 العمدة : هتروح بالبندقية يا شيخ البلد .
 مسعود : لأ خليها هنا، (ياخذها منه العمدة) ضاحكاً ضحكة صفراء
 العمدة : مع السلامة يا ابن عمي ، خلي بالك من نفسك
 (نقلة بموسيقى المولد بالغاب) .



اللوحة الثامنة

والأخيرة

(تنتقل الإضاءة على مشهد كلي للحقل والغيط والساحة

على سالم وأهل البلد)

سالم : (يدخل ومع فستان الفرح) يا با صالح يا عليوة .

صالح : دا سالم أهه اللهم اجعله خير .

عليوه : احنا هنا يا سالم .

سالم : (يدخل يفاجأ بصابحة) صابحة صابحة .

صابحة : (تجري نحوه) سالم سالم (تبكي)

سالم : انتي فين داني لفيت عليك البلد .

صابحة : خير يا سالم .

سالم : اسمعيني ما فيش وقت ، يا جماعة يا باصالح يا عم عليوة أنا
بشهدكم قدام ربنا إني صابحة حنتقي مري حلاي على سنة الله
ورسولة .

صالح : إن كان علينا إحنا في غاية الرضا واحنا موافقين .

صابحة : أبا صالح يا ناس مش وقته يا ناس أنتوا بتقولوا إيه .

عليوة : هو ده أحسن وقت .

سالم : صابحة ساعدني عشان أرجع حقلك وحق أبوكي اللي اتسرق

ساعديني عشان آخذ حقي اللي عايزين ينهبوه عيني عينك ف

عز الظهر ساعديني عشان أقدر أقف ف وشهم إيدك على

إيدي نبقي يد وحدة نبني بيت نحقق فيه حلم عمرنا ، ونداوي

سوا جراحك وجراحي اللي سببها أهلنا لحمنا ودمنا

ساعدوني كلكم هاتوا أديكم ف اديا نرجع كل حق لصحابه

نرجع الضحكة لولادنا إديكم على إيدي نرجع الفرحة لكل

بيت ساعدوني أحقق حلمي وحلمكم الضايع من سنين قلتي

إيه يا صابحة .

صابحة : أنا خايفه خايفة قوي يا سالم .

سالم : ما تخافيش أنا جنبك

صابحة : وأبويا .

سالم : أبوكي راجع راجع والله العظيم راجع .
عليوة : ياللا ياللا متضيعوش وقت ماتسمعوننا زغروتة يا بنت انتي
وهي ولا أزغرت أنا .
صالح : على خيرة الله مبروك يا أولاد (يأخذهم ويجلسهم وسالم يلبس
الطرحة لصابحة) .
عليوة : (يحمل صينية شموع)
الحنة الحنة يا سلام ع الحنة الحنة الحنة يا سلام ع الحنة
الحنة الحنة من مصر جابوها
الحنة الحنة صواني عجنوها
الحنة القوصي يا ولا يا حلال فلوسي يا ولا .
شباب : يلتفون والله والله العظيم حلو والنبي
يلتفون والله والله العظيم ورد والنبي
عليوة : الحلوة اللي قبالي شباييك منورين
الشباب : شباييك منورين .
عليوة : والشيخ اللي قبالي شمعاته قايدين .
الشباب : شامعاته قايدين .
عليوة : طوح ف كمامك طوح يا لابس اللبي .
الشباب : يا لابس اللبي .
عليوة : راجل وسيد الرجالة والعمة مظهرة .

الشباب : والعمة مظهرة .
عليوة : يا بت اديني دراعك واسبل عيني وانا .
الشباب : وسبل عيني وانا .
(يبدأ صالح في لعب العصا مع عليوة ثم تبدأ البنات في الزغاريد)
يا بت اديني حجابك أنا أشمه وأقلعه
الشباب : أنا أشمه وأقلعه
دا حجابي راح المنيا سبحان مين يجمعه
البنات : سبحان مين يجمعه
الشباب : عشق البنات يا قاضي حلال ولا حرام
البنات : حلال ولا حرام
الشباب : حرام على المتجوز أما العاذب حلال
البنات : أما العاذب حلال
(يتكون هنا موكب بالعصا من الشباب يمر من تحته سالم وصابحة ثم يسمع طلق ناري يسقط على أثره سالم مرتكزاً على الأرض والشموع تضيء وجهه)
صابحة : سالم .
سالم : صابحة يا أولاد يا بنات أوعوا تطفوا الشمع الليلة دي فرحي أنا وصابحة ، صابحة يا كل عمري اللي راح يا كل عمري

اللي جاي خلوا الشمع يقيد على طول يا بت اديني ذراعك

واسبل عيني وأناام ، واسبل عيني وأناام .

صابحة : (صارخة) سالم ساااالم .

المغني : أغراب علينا أغراب

ياللي ناهشين لحمنا

أغراب علينا أغراب ياللي ماصين دمنا

لا انتوا أهل ولاصحاب

ولا أنتوا أبداً مننا .

ولا أنتوا توبكم زي توبنا

مادام ما بتحسوش عذابنا

ولا أنتوا أبدأ مننا

أغراب علينا أغراب

صابحة : يا بت اديني ذراعك واسبل عيني وأناام ، نام يا سالم/نام (

يسمع دق هون)

نام نام وادبلك جوز الحمام ، العروسة فين العروسة العروسة

فين ياسالم يا عريس لسة ما فرحتش العروسة ضاعت ،

عاروسة المولد سرقوها ، دبحوها عروسة المولد اتكسرت يا

سالفم ف عز فرحتها .

الشباب : (يتقدمون بأيديهم) .

صاحبة : جاين ليه دلوقتي جاين تشوفوا آخر الحكاية ، جاين تنفروا

الشباب : مانتى كنتي معاه ؟

صاحبة : دبحوه من إديه ، قتلوه .

الشباب : ما انتي عارفه اللي قتلته .

صاحبة : وانتوا عارفين كل شي لكن مخروصين .

الشباب : أيه اللي ياديننا نعملوا ؟

صاحبة : جاين تسألوني نسيتموا كلامك ليه ، عهدكم معاه ، نسيتموا

قوام ولا انتوا بتوع كلام ، بتوع كلام ، مادوروا جاين

تلاقوه ؟ .

الشباب : قتلوه بيايه .

صاحبة : بتسألوني نسيتموا حالاً مش مهم القتل بيايه إن كان بسم ولا

خنجر ولا سكين ولا طلقة بندقية . مش مهم المهم إنه اتقتل

بس الحقيقة لسة ضايعة دوروا فتشوا جاين تلاقوها مدفونة

جوه خيط جوه حيط المهم تدوروا ، ماتخافوش ، ومتيأسوش

إن تاه منكم السيل يوم ، لو هتتوا ف السكة ألف مرة بكوة

تلاقوا ألف سكة وسكة مفتوحين المهم حاولوا متيأسوش أهم

حاجة ما تخافوش الخوف لعين ما تنموش الخوف لعين ما

تقربوش الخوف لعين(تعود لسالم)نام يا عريس نام نام ياسالم نام.

(يسمع طلق ناري يتجه الجميع لأعلى مستوى المسرح حيث يظهر

الفولي)

الجميع : الفولي .

الفولي : أيوه الفولي ، واحد بوحدة يا سالم نام وارتاح يا ولدي .

المجموعة : الفولي

الفولي : أيوه الفولي يا بلد رجع ياخذ حق من نن عنين كل ظالم العين

بالعين والسن بالسن والبادي أظلم أيوه الفولي اللي عاش

طول عمره عامل خده مداس للناس ، الفولي اللي عاش

بينكم وعامل ضهره قنطرة تتحمل الدوس الفولي اللي عاش

غلبان كافي خيره شره وراضي بقليله وعایش أيوه الفولي

راجع قلبه مليون غل متعي كره ، راجع ما يهمهوش حد

واصل الفولي أيوه الفولي اللي عاش مطاطي مستحمل كل

شيء الفولي اللي كان يبسطة انباساط الناس ويخزنه حزنهم

ويخوفه خوفهم واللي حاول يرفع صوته مرة جواله اللي

جواله بصموه بيع وشرى ويا ريت قبض التمن خلاص يا سالم

وحيات دمك الغالي وحيات عاروستك عروسة المولد اللي

بدور عليك ف الموالد الفولي رجع الفولي رجع الفولي رجع يا

بلد .

(يبدأ نعيش سالم يتدوال بين أيدي الجميع على نعمة المولد

وصاحبة تلف حولة)

الله حي الله حي الله حي الله حي

وانتوا اللي زرعتموا العتمة في قلب الضي

الله حي الله حي

من نن عنين البني أدمين خطفتوا الضي

الله حي الله حي

نشفتوا الريق والدم ف عرق الحي

الله حي الله حي

ولا عادت بطن أماتنا تجيب الحي

الله حي الله حي

ولا عاد الدم ف عرق الشققا أصبح مي

الله حي الله حي

من قلب الفقرا همشتوا اللحم بي

الله حي الله حي

(يستمر دوررؤان المولد على الأترا ويثبت المنظر على الأترا)

تمت بحمد الله

أحمد الليثي

رقم الإيداع بدار الكتب المصرية

١٩٩٩ / ٨٨٤٢

طبع بمطابع روتابرينت